

清

史

稿

宣宗本紀一

宣宗效天符運立中體正至文聖武智勇仁慈儉勤孝敏寬定成皇帝諱旻寧
仁宗次子母孝淑睿皇后乾隆四十七年八月初十日生上於攝芳殿幼好學
從編修秦承業檢討萬承風先後授讀又與禮部右侍郎汪廷珍翰林侍讀學
士徐廻朝夕講論乾隆五十六年八月高宗行圍威格遜爾上引弓獲鹿高宗
大喜賜黃馬褂花翎嘉慶元年娶孝穆成皇后四年四月戊戌仁宗遵建儲家
法親書上名緘藏錫匣十三年正月孝穆成皇后薨繼娶孝慎成皇后十八年
九月從幸秋獮木蘭上先還京師而教匪林清黨犯闕之變作是月戊寅賊入
內右門至養心殿南欲北竄上御槍斃二賊餘賊潰散亂始平飛章上聞仁宗
欣慰封上爲智親王號所御槍曰威烈諭內閣曰忠孝兼備豈容稍靳恩施上
謙冲不自滿假謝恩奏言事在倉猝又無禦賊之人勢不由己事後愈思愈恐
其不矜不伐如此二十五年秋七月仁宗秋獮熱河上隨扈戊寅仁宗不豫己

卯大漸御前大臣賽冲阿索特納木多布齋軍機大臣托津戴均元盧蔭溥文孚總管內務府禧恩和世泰公啓鏞匣宣示嘉慶四年御書立上爲皇太子仁宗崩即日奉大行皇帝梓宮回京辛巳尊母后爲皇太后晉封悼郡王絳愷爲悼親王絳愉爲惠郡王癸未奉皇太后懿旨大行皇帝龍馭上賓皇次子智親王仁孝聰睿英武端醇見隨行在自當上膺付託撫馭黎元但恐倉卒之中大行皇帝未及明諭而皇次子秉性謙冲予所深知爲降諭旨傳諭留京王大臣馳寄皇次子卽正尊位上奉懿旨恭摺覆奏並將御前大臣等啟鏞匣所藏嘉慶四年四月立皇太子殊諭進呈召在籍翰林院侍講秦承業來京八月乙酉命遵古制行三年之喪臣民仍照定例持服免直隸承德府屬及經過宛平等五州縣明年額賦癸巳允王大臣請持服百日乙未大行皇帝梓宮還京師御史袁銑疏陳定規模正好惡七事上優詔嘉納之加方受疇太子太保戊申大學士九卿等奏上大行皇帝廟號尊諡曰仁宗受天興運敷化綏猷崇文經武孝恭勤儉端敏英哲睿皇帝頒大行皇帝遺詔於朝鮮琉球暹羅越南緬甸諸

國庚戌上卽皇帝位於太和殿告祭天地太廟社稷頒詔天下以明年爲道光元年加恩中外非常赦不原者咸赦除之加黃銀劉鑾之賽冲阿孫玉庭蔣攸銛太子少保辛亥停本年秋決是月賑河南許州地震災貸盛京彰武蠶邊門等處被淹兵丁一年錢糧並給修屋費貸巨流河等處一月口糧九月己未尊大行皇帝陵曰昌陵庚申切責軍機大臣以擬遺詔錯誤托津戴均元軍機大臣文孚盧蔭溥仍留軍機大臣均下部嚴議斌靜奏冲巴噶什布魯特蘇爾奇糾薩木薩克之子張格爾作亂命慶祥兼程赴喀什噶爾勦之命大學士曹振鏞尙書黃鉞英和在軍機大臣上行走壬戌以那彥成爲理藩院尙書命吏部尙書協辦大學士吳璥督理河南儀封河工調劉鑾之爲吏部尙書茹彞爲兵部尙書盧蔭溥爲工部尙書黃鉞爲戶部尙書汪廷珍爲禮部尙書顧德廣爲左都御史起松筠爲左副都御史戊辰以秦承業爲翰林院侍講學士命在上書房行走庚午上始御西廠帷次引見廷臣詔開鄉會試恩科命臣工切實言事丁丑豫親王裕興以罪奪爵圈禁壬午加提督楊遇春太子少保賞雙眼

花翎是月賑河南睢州等七州縣水災並給睢州等四州縣一月口糧冬十月
戊子調英和爲戶部尙書那彥成爲吏部尙書穆克登額爲工部尙書普恭爲
禮部尙書和世泰爲理藩院尙書松筠爲左都御史辛丑上大行皇帝尊諡廟
號翌日頒詔天下覃恩有差甲辰賑江蘇被水江甯等八州縣安徽被水鳳陽
等府所屬州縣戊申以德英阿爲烏魯木齊都統是月賑江南海州安徽泗州
等八州縣及屯衛水旱災給浙江蕭山等三十三縣貧民口糧十一月丙辰上
奉皇太后居壽康宮戊辰以魏元煜爲江蘇巡撫左輔爲湖南巡撫庚午冬至
祀天於圓丘自是每歲如之癸酉以誠安爲左都御史松筠爲熱河都統甲戌
誠安改鑲黃旗漢軍都統以文孚爲左都御史丁丑翰林院侍講學士顧莛奏
松筠宜置左右忤旨下部嚴議十二月甲申上皇太后徽號曰恭慈皇太后翌
日頒詔天下覃恩有差諭奉皇太后懿旨立皇帝繼妃佟佳氏爲皇后丙戌和
世泰改福州將軍以晉昌爲理藩院尙書調慶保爲閩浙總督以史致光爲雲
貴總督韓克均爲雲南巡撫顏檢爲福建巡撫庚寅河南儀封決口合龍癸巳

加上孝敬憲皇后孝聖憲皇后高宗純皇帝孝賢純皇后孝儀純皇后尊諡英和罷軍機大臣照舊供尙書等職丙申以汪廷珍湯金釗方受疇蔣攸銘言查陋規不使予議敍孫玉庭奏尤爲剴切溫諭褒之起李鴻寶爲安徽巡撫召張映漢來京以陳若霖爲湖廣總督帥承瀛爲浙江巡撫是歲朝鮮琉球來貢

道光元年春正月癸丑御太和殿受朝樂設而不作不讀賀表丙辰賞刑部員外郎初彭齡禮部侍郎銜裁浙江鹽政以巡撫兼管己未以文孚爲禮部尙書那清安爲左都御史丁卯越南進香表賀貢方物詔止之丙子朝鮮國王李琿奉表慰唁廓爾喀王熱尊達爾畢噶爾瑪薩野奏仁宗升遐成服貢金緞賜敕嘉賚之二月壬午朔日食班禪額爾德尼進貢物賜敕褒嘉賚之戊戌協辦大學士吳璥予告庚子命孫玉庭爲協辦大學士仍留兩江總督加陝甘總督長齡太子少保甲辰免江西豐城等六縣民借籽種口糧逋穀三月辛亥朔欽天監奏本年四月初一日日月合璧五星聯珠詔益勵寅恭與內外臣工共圖上理不必宣付史館壬子以送仁宗睿皇帝梓宮至山陵命莊親王綿課等留京

辦事癸丑再免經過地方本年旗租並給麥田籽種辛酉仁宗睿皇帝發引上
奉皇太后送至昌陵壬戌廓爾喀進登極表貢命與道光二年例貢同進丙寅
上謁泰陵泰東陵昌陵隆恩殿上孝淑睿皇后尊諡曰孝淑端和仁莊慈懿光
天佑聖睿皇后丁卯命成都將軍瑪呢善赴雲南幫辦軍務癸酉葬仁宗睿皇
帝於昌陵加托津曹振鏞太子太傅丁丑上奉皇太后還京師戊寅仁宗睿皇
帝孝淑睿皇后升祔太廟己卯以升祔禮成頒詔天下覃恩有差命貴州提督
羅思舉赴雲南軍營協勦是月貸山西岢嵐等十州縣甘肅狄道等五州縣上
年災民倉穀口糧夏四月丙戌常雩祀天於園丘仁宗睿皇帝配享自是歲以
爲常庚寅授瑪呢善爲欽差大臣督辦雲南永北軍務授那清安左都御史大
學士三等侯明亮致仕命戴均元穆克登額阿克當阿相度萬年吉地甲辰雲
南大姚拉古賊平丁未上詣大高殿祈雨戊午撥江蘇海州等州縣賑銀四十
五萬六千兩命伯麟爲大學士管兵部以長齡爲協辦大學士仍留陝甘總督
任癸亥詔停本年秋決甲子授伯麟體仁閣大學士曹振鏞武英殿大學士丙

寅封阮福岐爲越南國王以松筠爲兵部尙書慶惠爲熱河都統壬申夏至祭地於方澤仁宗睿皇帝配享自是歲以爲常癸酉雲南永北大姚賊平六月辛巳以張師誠爲廣東巡撫甲申安定門災庚寅上御太和門命鄭親王烏爾恭阿順承郡王倫柱齋冊寶詣孝穆皇后殯官行冊設禮戊戌召成齡來京以李鴻賓爲漕運總督孫爾準爲安徽巡撫除河南新鄉縣地賦以琦善爲山東巡撫秋七月庚戌刑部尙書和瑛卒調那彥成爲刑部尙書松筠爲吏部尙書晉昌爲兵部尙書以穆克登布爲理藩院尙書己未嚴煇以三品頂戴署河東河道總督丁卯調毓岱爲江西巡撫以楊懋恬爲湖北巡撫庚午上奉皇太后謁西陵免經過地方額賦十分之三壬申上奉皇太后還京師是月賑甘肅甯夏等四縣水旱災並免上年額賦八月庚辰展順天鄉試於九月舉行丁亥命松筠在軍機大臣上行走以特依順保爲烏里雅蘇台將軍癸巳兵部尙書茹茨卒以初彭齡代之乙未霍罕遣使請入覲卻之丙午調張師誠爲安徽巡撫孫爾準爲廣東巡撫九月戊辰暹羅國王鄭佛遣使進香貢方物溫諭止之己巳

召長齡來京以朱勳署陝甘總督是月賑安徽宿州等三州縣水災冬十月己卯上御乾清門聽政自是歲以爲常丁亥調孫爾準爲安徽巡撫嵩孚爲廣東巡撫十一月己未貴州巡撫陳若霖奏請歲減民苗佃租二萬二千石給苗犂會試舉人川費允之壬戌以河防功加黎世序太子太保銜十二月戊子以邱樹棠爲山西巡撫癸巳吏部尙書劉鏞之卒調盧蔭溥爲吏部尙書免軍機大臣調初彭齡爲工部尙書以戴聯奎爲兵部尙書是歲朝鮮越南琉球來貢二年春正月丁未朔方受疇病免以顏檢爲直隸總督長齡署之以葉世倬爲福建巡撫辛酉祈穀於上帝仁宗睿皇帝配享自是每歲如之庚午召特依順保來京調奕顥爲烏里雅蘇台將軍松筠爲黑龍江將軍以晉昌爲盛京將軍那清安署兵部尙書辛未以三載考績予曹振鏞等議敘罷侍郎那彥寶善慶吳芳培降左都御史顧德慶以王鼎爲左都御史命長齡回陝甘總督以松筠署直隸總督那彥成署吏部尙書二月丁亥以謁陵命莊親王絳課等留京辦事癸巳兵部尙書戴聯奎卒以王宗誠代之三月丙午撥江蘇上元等二十州

縣賑銀五十四萬兩丁未上謁東陵免經過地方額賦十分之三庚戌上謁昭
西陵孝東陵景陵裕陵詣端慧皇太子園寢奠酒調穆克登額爲禮部尙書文
孚爲工部尙書癸丑上還京師甲寅上奉皇太后謁西陵免經過地方額賦十
分之三乙卯以裕陵工程不慎降莊親王縣課爲郡王解戴均元太子太保及
管刑部視蘇楞額職令在工次聽差仍分成賠繳有差戊午上謁泰陵泰東陵
昌陵己未清明節上詣昌陵行數土禮壬戌上詣孝穆皇后殯宮前奠酒奉皇
太后還京師閏三月戊寅穆克登布免理藩院尙書乙酉以禧恩爲理藩院尙
書庚子賜戴蘭芬等二百二十二人進士及第出身有差是月蠲緩奉天甯遠
等三州廳額賦夏四月辛未上孝敬憲皇后孝聖憲皇帝高宗純皇帝孝賢純
皇后孝儀純皇后尊諡藏冊寶於太廟盛京太廟並藏仁宗睿皇帝孝淑睿皇
后冊寶於盛京太廟壬午青海番賊平以阿霖爲江西巡撫乙酉以倉場侍郎
英晉奏事妄言誅批駁斥降內閣學士是月蠲緩河南睢州等十六州廳縣沙
歷陵占水占地賦直隸滄州等五州縣並嚴鎮海豐二場被水賦課六月癸丑

大學士伯麟原品休致命戴均元仍管刑部己未命那彥成署陝西巡撫調嵩孚爲貴州巡撫以羅含章爲廣東巡撫以那清安署刑部尙書壬戌褫松筠吏部尙書軍機大臣命以六部員外郎候補戊辰命長齡爲大學士兼管理藩院以英和協辦大學士調文孚爲吏部尙書禧恩爲工部尙書以那清安爲兵部尙書玉麟爲左都御史己巳以富俊爲理藩院尙書松筠爲吉林將軍德英阿爲黑龍江將軍英惠爲烏魯木齊都統是月賑山西興縣水災秋七月以程祖洛爲河南巡撫王鼎署之以程國仁爲陝西巡撫是月賑直隸霸州等二十一州縣水災八月癸卯召雲貴總督史致光來京以明山代之河南新蔡縣教匪朱麻子作亂命程祖洛捕誅之戊申召慶保來京以趙慎畛爲閩浙總督盧坤爲廣西巡撫庚戌以盧坤署陝西巡撫戊辰賞廓爾喀國王寶石頂戴鳴篋畢木興塔巴三品頂戴辛未召長齡松廷來京以那彥成署陝甘總督是月給河南安陽等三縣直隸霸州等十二州縣山西歸化城薩拉齊二廳山東恩縣等三縣水災口糧貸土默特被水蒙古口糧蠲緩山東高唐等四十一州縣衛雲

南鶴慶劍川二州災歉賦課九月壬申朔允暹羅進本年例貢甲戌撥通倉米十萬石賑直隸被水災民乙酉四川果洛克番賊平授嚴烜河東河道總督庚寅以蔣攸銛署刑部尙書調陳若霖爲四川總督李鴻賓爲湖廣總督以魏元煜爲漕運總督韓文綺爲江蘇巡撫庚子調盧坤爲陝西巡撫以成格爲廣西巡撫是月給江西瑞昌縣河南武陟原武二縣災民口糧冬十月丙午謁陵命莊親王繇課等留京辦事授邢彥成陝甘總督蔣攸銛刑部尙書乙卯上以釋服奉皇太后謁西陵免經過地方額賦十分之三己未上謁泰陵泰東陵昌陵庚申上謁昌陵行釋服禮癸亥上奉皇太后還京師是月賑甘肅河州安徽宿州直隸霸州等四十三州縣江蘇海州湖北天門二縣水災貸給盛京廣甯縣山東濮州等五州縣黑龍江城庫木爾等二站水災口糧蠲緩甘肅靜甯等六州縣河南儀封等二十三廳縣湖北沔陽等十三州縣山東濮州等五十一州縣衛直隸通州等十八州縣江蘇海州等三十四廳州縣衛被水災新舊額賦墨爾根布特哈舊欠糧石長蘆及江蘇松江府屬正溢鹽課十一月辛未朔以

王麟署禮部尙書癸未撫恤廣東省城火災貧民蛋戶乙酉以王麟爲禮部尙書慶保爲左都御史丙戌立繼妃佟佳氏爲皇后翌日頒詔天下覃恩有差戊子起松筠爲光祿寺少卿壬辰上詣大高殿祈雪丁酉以冊立皇后禮成上皇太后徽號曰恭慈康豫皇太后翌日頒詔天下覃恩有差是月賑安徽宿州等七州縣及屯坐各衛河南武陟縣水災旱災給安徽泗州等八州縣甘肅河州等十一州廳縣災民口糧蠲緩安徽宿州等十七州縣及屯坐各衛河南武陟陽武二縣甘肅狄道等六州廳縣江西南昌等七縣並南昌九江二衛湖南澧州浙江海甯等四州縣被災新舊額賦長蘆被水引地兩淮板蕩等九場被水新舊額賦十二月丙午上詣大高殿祈雪癸丑上以祈雪未應命再禱七日熱河都統成德卒以慶保代之賞松筠二品頂戴爲左都御史調程含章爲山東巡撫以陳中孚爲廣東巡撫甲寅河南虞城縣匪徒盧照常等作亂捕誅之庚申免江蘇安徽嘉慶二十三年以前民欠攤徵銀調德英阿爲綏遠城將軍祿成爲黑龍江將軍乙丑內閣漢票簽處火是月給直隸大城縣水災口糧貸直

隸駐紮災區兵丁餉銀蠲緩直隸隆平等三縣江蘇山陽等四縣水災旱災額賦是歲朝鮮暹羅琉球來貢

三年春正月壬申御重華宮宴羣臣及內廷翰林調孫爾準爲福建巡撫以陶澍爲安徽巡撫以廓爾喀額爾德尼王遣噶箕達納彭咱邦禮等來賀登極進表貢賜詔嘉勉仍優賚之壬午幸圓明園乙未命大學士長齡在軍機大臣上行走以史致光爲左都御史是月賑奉天小黑山白旗堡旗戶直隸霸州等三十六州縣江蘇海州水災給江蘇邳州等八州縣衛水災安徽宿州等十二州縣衛水災旱災河南武陟縣水災山東濮州等六州縣災民一月口糧貸浙江海鹽長興二縣旱災陝西留壩等十一廳州縣雹災水災甘肅靜甯等十七州縣地震災兩淮板浦等九場水災河南武陟等三縣黑龍江齊齊哈爾墨爾根城旗丁水災籽種糧石二月辛丑朔命以原任大學士阿桂配饗太廟調嵩孚爲湖南巡撫以程國仁爲貴州巡撫丁未釋奠先師孔子辛亥以原任尙書湯斌從祀文廟癸丑上詣文廟釋奠臨辟雍講學加禮部尙書汪廷珍太子太保

銜是月加給直隸大城縣口糧三月壬申上御勤政殿聽政乙亥上親耕藉田
加一推丙子上奉皇太后幸南苑上行圍辛巳上奉皇太后還宮甲午上奉皇
太后閱健銳營兵戊戌調程含章爲江西巡撫以琦善署山東巡撫是月加給
直隸文安縣災民一月口糧夏四月甲辰召顏檢來京以蔣攸銛爲直隸總督
調那清安爲刑部尙書玉麟爲兵部尙書以戶部左侍郎穆克登額爲禮部尙
書癸亥上禱雨於覺生寺甲子賜林召棠等二百四十六人進士及第出身有
差五月辛未賑直隸霸州等州縣災是月賑直隸霸州等三十六州縣災民六
月命署上部侍郎張文浩會同蔣攸銛查勘南北運河並永定大清漳沔各河
戊午以果勒豐額爲烏里雅蘇台將軍永定河決壬戌北運河決是月加給直
隸靜海青縣二縣災民兩月口糧貸河南汝陽正陽二縣倉穀秋七月戊辰以
陸以莊爲左都御史己巳以直隸霸州等十州縣被淹較重飭撥銀米先行撫
恤飭琦善撲蝗壬午以江蘇水災免各關商米稅銀免河南應攤川楚及衛案
軍需四百六十萬兩是月給江西德化縣湖北黃梅縣江蘇太倉等十七州廳

縣水災一月口糧加賑直隸通州等二十一州縣水災八月己亥初舉經筵乙卯以浙江杭州等三府屬水災免海運商米船稅並留各關稅銀備賑是月賑安徽無爲等十六州縣水災給河南濬縣等十三縣水災一月口糧九月壬申以謁陵命托津英和盧蔭溥汪廷珍留京辦事丁丑永定河決口合龍壬午上奉皇太后謁西陵丙戌謁泰陵泰東陵昌陵丁亥免直隸通州二十七州縣水災額賦己丑奉皇太后還京師壬辰以松筠爲吉林將軍穆彰阿爲左都御史是月賑直隸通州等四十州縣山東臨清等五州縣水災加賑江西德化縣湖北黃梅縣河南武陟等五縣水災給江蘇儀徵等四縣湖北江陵等三縣水災口糧蠲緩山東臨清等十六州縣衛直隸薊州五十州縣水災新舊額賦河南武陟縣湖北黃梅縣水災額賦及屯坐各衛應徵新舊額賦並給修屋費冬十月賑湖北江陵等三縣衛水災並免新舊額賦給修屋費奉天錦州旗民山東武城縣水災一月口糧直隸天津鎮三營及紫荆關各汛被水兵丁銀米乙亥以毓岱爲廣西巡撫是月貸甘肅靜寧等十六州縣災民口糧蠲緩湖南澧

州等五州縣等水災甘肅宜禾縣旱災新舊額賦癸丑以緝盜功加陝西陝安道嚴如燧按察使銜是月貸江蘇蘇州等五府駐紮災區兵丁銀米是歲朝鮮琉球暹羅緬甸來貢

四年春正月壬申命停今歲木蘭秋獵癸酉享太廟命皇子奕緯代行禮癸未撥戶部銀八萬兩貸直隸貧民口糧是月賑直隸通州等三十八州縣上年雹災河南武陟縣濬縣旱災各一月給江蘇太倉等三十州縣衛安徽無爲等十七州縣衛浙江海甯等十二州縣橫浦等四場兩淮安豐等九場水災山東臨清等五州縣雹災一月口糧貸河南武陟等十二縣上年水災籽種口糧倉穀江西德化等十四縣湖北黃梅等三縣及各屯衛湖南澧州等四州縣甘肅秦州等十州縣齊齊哈爾等三城被災軍民籽種口糧江蘇秦興營兵丁兩月錢糧二月丁酉召松筠爲都察院左都御史以富俊爲吉林將軍穆彰阿爲理藩院尙書軍機大臣江南河道總督黎世序卒以張文浩代之己亥御經筵甲寅上奉皇太后幸南苑丁巳上行圍己未上奉皇太后還宮是月給江蘇銅山縣

災民一月口糧調毓岱爲江西巡撫以康紹鏞爲廣西巡撫丁亥上閱健銳營兵初彭齡能以陳若霖爲工部尙書夏四月壬戌貸湖北武昌府屬道士泆營荊州城守等營兵丁倉穀江南徐州鎮標中營等駐紮災區兩月錢糧五月己巳上詣黑龍潭祈雨甲戌雨增致祭堂子禮戊寅增皇太后萬壽告祭太廟後殿禮六月癸巳朔日食乙巳以張師誠爲山西巡撫甲寅暹羅國王鄭佛卒秋七月丙子韓對免以陳若霖爲刑部尙書陸以莊爲工部尙書姚文田爲左都御史辛巳大學士戴均元致仕是月貸湖北衛昌德安二營兵丁倉穀閏七月辛丑江蘇巡撫韓文綺降調調張師誠爲江蘇巡撫以朱桂楨爲山西巡撫壬寅以韓克均兼署雲貴總督丁未命孫玉庭爲大學士以蔣攸銛爲協辦大學士均仍留總督任成都將軍呢瑪善卒以奕顛爲綏遠城將軍辛亥以福綏爲山西巡撫乙卯免安徽無爲等三十一州縣上年水災旱災額賦是月貸江南二營銀米八月壬戌命江蘇按察使林則徐濬浙江水道己巳御試翰林詹事等官擢朱方增五員一等餘升黜有差戊寅御經筵庚辰以蘇明阿爲貴州巡

撫內戊子告大學士伯麟卒丁亥以成格爲江西巡撫是月蠲緩長蘆興國等七場滄州等七州縣上年水災隨課甘肅宣禾縣旱災額賦九月壬寅以黃鳴傑爲浙江巡撫癸卯免安徽無爲等十一州縣被災學田租銀是月給陝西甯羌等四州縣災民口糧貸江蘇瓜州營被災兵丁銀米陝西安定等縣水災雹災倉穀冬十月乙丑回曾張格爾入烏魯克卡倫官軍失利侍衛花山等陣亡丙子巴彥巴圖等率兵勦張格爾敗之張格爾奔喀拉提錦甲申子告大學士章煦卒以孫玉庭奏開王營減水壩命相機速辦十一月己酉以高堰十三堡決口張文浩交部嚴議辛亥命文孚汪廷珍往江南查看高堰決口調嚴煇爲江南河道總督以張井署河東河道總督甲寅孫玉庭坐徇隱張文浩免兩江總督以魏元煜署命兵部尙書玉麟在軍機大臣上行走是月給安徽宿州靈璧縣及屯坐各衛災民口糧貸江甯八旗兩江督標協標兵丁餉銀甘肅靜寧等十三州縣及東樂縣丞所屬災民口糧十二月己未朔上復詣大高殿祈雪戊辰授魏元煜兩江總督以顏檢爲漕運總督己卯召明山來京以長齡爲雲

貴總督高堰決口合龍以慶保爲烏里雅蘇台將軍那清安爲熱河都統明山爲刑部尚書穆彰阿等是月給雲南太和等三縣災民景東廳屬鹽川鹽戶一月口糧及修屋費江蘇高郵等五州縣災民並清河廳災民一月口糧是歲朝鮮琉球來貢

五年春正月授戴三錫四川總督辛亥以三載考績予托津長齡曹振鏞黃鉞英和汪廷珍蔣攸銛那彥成嚴烺議叙加琦善總督銜是月給江蘇高郵等四州縣安徽天長縣泗州衛上年水災旱災軍民口糧貸直隸文安大城二縣河南汝陽淮甯二縣陝甘甯羗等七州縣甘肅狄道等四十州廳縣及肅州州同莊浪等縣丞所屬水災旱災雹災籽種口糧兩淮中正場水災鹽戶口糧雲南景東廳被水鹽井修費並免上年額課二月庚申御經筵甲子以謁陵命莊親王托津廬蔭溥汪廷珍留京辦事戊寅上奉皇太后謁陵免經過地方額賦十分之三上謁昭西陵孝陵孝東陵景陵裕陵至寶華峪閱視萬年吉地回鑾甲申幸南苑行圍是月給安徽天長縣災民一月口糧三月戊子朔上還京師以

琦善爲山東巡撫甲辰以程含章爲浙江巡撫壬子王鼎以一品銜署戶部左侍郎丙辰免河南積年民欠並河工加價攤銀是月貸直隸寶坻靜海二縣甘肅洮州廳十七廳州縣及莊浪縣丞所屬災民籽種口糧齊齊哈爾被災旗人耕牛銀夏四月乙丑免直隸積年逋賦辛未以伊里布爲陝西巡撫是月貸駐紮款區山西甯武等二營湖北安陸等三營荊州水師營提標後營兵丁倉穀五月甲午太監馬進喜以在滄墅關僞稱奉旨進香交刑部治罪諭各督撫凡遇通緝太監當認真緝捕有僞稱奉差者迅即奏辦丁酉黃鉞以年老免軍機大臣專辦部務仍直南書房命王鼎在軍機大臣上行走調張師誠爲安徽巡撫陶澍爲江蘇巡撫戊申孫玉庭顏檢能調魏元煜爲漕運總督以琦善爲兩江總督調伊里布爲山東巡撫以鄂山爲陝西巡撫甲寅以本年漕運遲誤諭切責孫玉庭等玉庭交部嚴議魏元煜顏檢議處是月賑貴州鎮遠府屬州縣水災並免額賦貸兵丁餉銀給城衙修費貸湖北荊州駐守等四營駐紮災區兵丁倉穀六月命蔣攸銛爲大學士仍留直隸總督任以禮部尙書汪廷珍協

辦大學士丁卯降魏元煜三品頂戴仍留漕運總督任孫玉庭顏檢均交琦善督令挑撥運河工費命玉庭檢元煜分領甲戌魏元煜卒以理藩院尙書穆彰阿署漕運總督前江南將軍普恭署理藩院尙書乙酉以陶澍奏停江南折漕仍讓河海並運是月貸福建提標五營泉州城守營穀價秋七月丁未以德英阿爲烏里雅蘇台將軍和世泰爲察哈爾都統是月減免直隸等七州縣積水地額賦八月以嵩孚爲刑部尙書調康紹鏞爲湖南巡撫以蘇成額爲廣西巡撫已未御經筵以陳中孚爲漕運總督調成格爲廣東巡撫以武隆阿爲山西巡撫九月乙酉召那彥成鄂山署陝甘總督調長齡爲陝甘總督趙慎畛爲雲貴總督以孫爾準爲閩浙總督調韓克均爲福建巡撫以伊里布署雲南巡撫調武隆阿爲山東巡撫韓文綺爲江蘇巡撫以嵩溥爲貴州巡撫庚子以張井爲河東河道總督甲辰以德英阿署伊犁將軍松筠署烏里雅蘇台將軍普恭署左都御史喀什噶爾幫辦大臣巴彥巴圖等率兵勦張格爾妄殺布魯特部人其酋汰列克糾衆圍巴彥巴圖等於喀什噶爾慶祥使穆克登布等援之命

慶祥緩來京是月賑陝西綏德等四州縣也災獨直隸開州等十五州縣旱災
雹災新舊額賦冬十月庚辰以長齡署伊犁將軍楊遇春署陝甘總督鄂山回
陝西巡撫命德英阿赴烏里雅蘇台召松筠來京辛巳召蔣攸銛以邢彥成爲
直隸總督是月賑陝西榆林等三縣也災十一月壬辰以暹羅國貢船漂沒詔
免其補貢封世子鄭福爲暹羅國王庚子免托渾管刑部以蔣攸銛代之並命
爲軍機大臣乙巳上詔大高殿祈雪內午除直隸昌黎縣捍禦灤河地額賦丁
未雪命慶祥以將軍銜署喀什噶爾參贊大臣壬子以慶祥爲喀什噶爾參贊
大臣兼鑲黃旗漢軍都統未任前以穆克登布署之授長齡伊犁將軍是月賑
甘肅岷州等六州縣水災雹災十二月己巳免山東章邱鄒平二縣被水通賦
戊寅命科爾沁郡王僧格林沁御前行走是月賑奉天錦州府旱災蟲災是歲
朝鮮琉球暹羅越南入貢

六年春正月甲申以雙城堡屯田加富俊太子太保是月賑奉天錦州中前所
等處旗戶水災給江蘇沛縣災民口糧貸奉天甯遠州旗民河南鄆陵等七縣

甘肅岷州等十二州縣山西襄垣縣直隸寶坻等三縣水災旱災蠲災籽種口糧倉穀二月戊午以謁陵命托津英和汪廷珍盧蔭溥留京辦事甲戌上謁西陵免經過地方額賦十分之三戊寅謁泰陵泰東陵昌陵辛巳上還圓明園三月癸巳調張井爲江南河道總督庚戌賞潘錫恩三品頂戴爲南河副總河是月貸山西靈邱縣湖北荊州等五營被災兵丁倉穀夏四月甲子上詔黑龍潭神祠祈雨甲戌以鄧廷楨爲安徽巡撫丙子賜朱昌頤等二百六十五人進士及第出身有差是月給江蘇沛縣災民口糧貸江蘇徐州鎮三營湖北德安宜都二營災區兵丁錢穀五月乙未禮部尙書穆登額免以松筠代之以邢清安爲左都御史以明山爲熱河都統戊戌雲貴總督趙慎軫卒調阮元代之以嵩孚爲湖廣總督明山爲刑部尙書慶惠爲熱河都統壬寅免直隸河間等五縣積水地畝逋賦是月給山東堂邑等十二縣旱災口糧貸直隸廣平等五縣山東堂邑等十二縣河南臨漳等十二縣山西隰州營口糧籽種倉穀六月賑湖北江陵當陽二縣水災給河南臨漳等七縣旱災口糧貸直隸大名鎮標等七

營被旱兵餉秋七月癸巳張格爾糾安集延布魯特回衆入卡喀什噶爾回衆
響應之命楊遇春爲欽差大臣勦之鄂山署陝甘總督命武隆阿爲欽差大臣
赴台灣己亥以德英阿爲伊犁參贊大臣倫布多爾濟署烏里雅蘇台將軍庚
子張格爾陷和闐城領隊大臣奕湄幫辦大臣桂斌等死之甲辰命長齡爲揚
威將軍以武隆阿爲欽差大臣與楊遇春參贊軍務乙巳以德英阿署伊犁將
軍是月賑江蘇高郵等六州縣水災給湖南醴陵等三州縣山西歸化城水災
口糧貸陝西西鄉盩厔二縣水災籽種奉天錦州府屬各驛馬乾銀八月回會
巴布頂等陷英吉沙爾甲戌張格爾陷喀什噶爾城參贊大臣慶祥幫辦大臣
舒爾哈善等死之進陷葉爾羌辦事大臣音登額幫辦大臣多隆武等死之是
月賑江蘇海州等五州縣水災給拉薩齊廳水災口糧貸山西綏遠城渾津黑
河水災口糧九月己卯朔黃銀免以王鼎爲戶部尙書辛巳幸南苑命固原提
督楊芳甘肅提督齊慎赴阿克蘇軍營丁亥還山明園戊子以博啟圖爲察哈
爾都統辛卯召穆彰阿來京以楊懋恬署漕運總督乙未以長清爲阿克蘇辦

事大臣己亥慶廉奏敗賊於阿察他克臺辛丑免阿克蘇附近回莊本年應交
麥石癸卯調格布舍爲烏里雅蘇台將軍是月給貴州松桃廳山西歸化廳江
蘇山陽鹽城二縣江西蓮花等七廳縣水災口糧銀穀冬十月庚申贈喀什噶
爾死事參贊大臣慶祥太子太保壬戌免兩淮富安等十四場水災簡課甲子
撥江蘇藩關道庫銀一百四十五萬兩賑高郵等二十州縣水災是月給安徽
宿州等八州縣衛被災口糧蠲緩江蘇高郵等四十七州廳縣衛災民新舊額
賦十一月戊子長齡等奏敗賊于阿克蘇之柯爾坪己丑以台灣平加孫爾準
太子少保是月賑湖南茶陵等三州縣災民貸甘肅秦州等十三州縣災民口
糧蠲緩盛京牛莊等處水災糧租湖南茶陵等五州縣水災新舊額賦十二月
戊申朔以楊健爲湖北巡撫以訥爾經額爲漕運總督丙辰回部扎薩克親王
伊什楚克魯布以僭妄削爵戊午調英和爲理藩院尙書禧恩爲戶部尙書穆
彭阿爲工部尙書是歲琉球朝鮮入貢

七年春正月丁酉和闐回衆降命優賞之尋復爲張格爾所陷庚子以惠顯爲

駐藏辦事大臣是月展賑江蘇高郵等二十三州縣衛軍民兩准丁豁等九場
竈戶水災給安徽泗州五河縣及屯坐各衛奉天白旗堡小黑山二處災款口
糧貸直隸開州等十州縣甘肅秦州等十七州廳縣河南原武等四縣兩淮富
安等五場江西蓮花等五廳縣災款口糧籽種河南修武封邱二縣山西薩拉
齊廳災民倉穀江蘇狼山等三營毗連災區兵餉三月已丑賑江蘇高郵等州縣
祈雨是月貸江蘇狼山等三營毗連災區兵餉三月已丑賑江蘇高郵等州縣
水災丙申長齡等奏敗賊於洋阿爾巴特晉長齡太子太保丁酉上詣黑龍潭
祈雨己亥長齡等敗賊于沙布都爾獲安集延回目色提巴爾第命蔣攸銛穆
彰阿查勘南河以那清安署工部尙書癸卯以惠顯爲駐藏大臣甲辰雨是月
賑江蘇高郵等州縣災民貸甘肅張掖等三縣直隸開州等六州縣貧民口糧
夏四月丙午朔日食戊申長齡等奏敗賊于阿克瓦巴特子長齡紫韁加楊遇
春太子太傅武隆阿太子少保壬子長齡等克喀什噶爾張格爾遜辛酉進克
英吉沙爾以張格爾未獲褫長齡紫韁楊遇春太子太傅武隆阿太子少保五

月庚辰楊芳克和闕獲回目噶爾勒等誅之壬午陸以莊免以王引之爲工部尚書癸未琦善張井潘錫恩嚴議琦善免兩江總督以蔣攸銛代之以托津管刑部丁亥命穆彰阿在軍機大臣上學習行走閏五月乙巳朔免回疆八城新舊額賦丙午命楊遇春回以楊芳爲參贊大臣戊申調奕額爲盛京將軍晉昌爲綏遠城將軍是月貸湖北黃州協道士汛營兵丁穀石六月壬午上詣白龍潭祈雨丙戌兩秋七月壬子協辦大學士禮部尚書汪廷珍卒晉昌免正黃旗領侍衛內大臣以鄭親王烏爾恭阿代之丙辰以姚文田爲禮部尚書湯金釗爲左都御史丁巳命盧蔭溥協辦大學士己未英和以失察家丁褫協辦大學士理藩院尚書紫韁召富俊爲理藩院尚書協辦大學士以博啟圖爲吉林將軍以安福爲察哈爾都統辛酉熱河都統昇寅免以那清安代之癸亥那清安仍爲左都御史褫太子太保降英和二品頂戴爲熱河都統乙丑以武隆阿爲喀什噶爾參贊大臣以盧坤爲山東巡撫戊辰免甘肅兵差過境之各州縣額賦協濟軍需之甘肅陝西各州縣額賦十分之六庚午論喀什噶爾等四城收

復功復楊遇春太子太保加鄂山廬坤太子少保壬申以再定回疆晉曹振鏞太子太師蔣攸銛文學太子太保加王鼎玉麟太子少保是月給奉天錦州等三府州縣水災旗民口糧八月癸未萬壽節停筵宴丙申調盧坤爲山西巡撫以琦善爲山東巡撫是月賑陝西略陽縣湖北江陵監利二縣水災給江淮等處被災幫丁月糧蠲緩江蘇高郵等四十七州縣衛廳被水新舊額賦九月癸丑以孝穆皇后梓宮移寶華峪命皇長子奕緯祖奠丙辰上詣孝穆皇后梓宮前奠酒授伊里布雲南巡撫戊午免兵差過境之陝西華州等二十二州廳縣額賦十分之六庚申上謁東陵免經過地方本年額賦十分之五癸亥謁昭西陵孝陵孝東陵景陵裕陵召長齡以德英阿爲伊犁將軍晉戴均元太子太師是日回鑾庚午以楊國楨爲河南巡撫免兵差過境之盛京省城及所屬開原等十四處旗民額賦十分之四是月加賑陝西略陽縣水災冬十月庚辰免嘉慶二十五年至道光五年通省民欠正雜錢糧壬午皇太后萬壽聖節奉懿旨停筵宴丙戌禮部尙書姚文田卒以湯金釗代之以潘世恩爲都察院左都御

庚寅巴爾阿免以額勒津爲科布多參贊大臣丁酉以綸布多爾濟爲庫倫蒙古辦事大臣是月賑湖北江陵監利二縣及屯坐各衛水災給奉天廣甯縣被水站丁口糧貸山西定襄潞城二縣旱災卹災倉穀黑龍江墨爾根城歉收口糧十一月乙巳命長齡督同楊芳辦理回疆善後事宜丙午召那彥成庚戌授那彥成欽差大臣會同長齡籌辦回疆善後事宜以居之申署直隸總督已巳免奉天遼陽等七州廳縣地丁銀十分之四是月賑甘肅岷州等六州縣水災卹災十二月以彥德爲烏里雅蘇臺將軍是歲朝鮮琉球暹羅入貢

八年春正月丙午以松筠署熱河都統那清安署禮部尙書戊申授劉彬士浙江巡撫壬戌長齡奏獲張格爾癸亥封長齡威勇公授御前大臣封楊芳果勇侯調果齊歡爲綏遠城將軍乙丑晉曹振鏞太傅文孚太子太傅玉麟太子太保加穆彰阿太子少保並充軍機大臣授楊遇春陝甘總督丙寅晉蔣攸銛太子太傅復英和太子太保命那彥成仍以欽差大臣赴喀什噶爾借楊芳辦善後丁卯加禧恩太子少保是月給江蘇沛縣貧民口糧貸直隸滄州等九州縣

災歉口糧湖北江陵監利二縣及屯坐各衙籽種山西定襄等四縣倉穀江蘇
江甯京口駐防修屋費二月乙亥羣臣以再定回疆上尊號卻之命議上皇太
后徽號都察院左都御史史致光卒三月庚子朔日食乙巳上行圍至丁巳皆
如之戊申上還宮是月貸直隸開州等六州縣貧民口糧夏四月調果齊歡爲
黑龍江將軍以特依順保爲綏遠城將軍是月貸山西代州等二十四州縣歉
收湖北駐紮災區荊州水師各營倉穀五月己酉以獲張格爾遣官告祭太廟
社稷行獻俘禮庚戌御午門受俘首長齡太保加楊芳太子太保壬子上廷訊
張格爾罪磔於市丁巳命圖平定回疆四十功臣及軍機大臣曹振鏞文孚王
鼎玉麟像於紫光閣是月貸湖北駐紮歉區黃州協兵丁倉穀六月癸酉揚威
將軍大學士長齡凱旋命鄭親王烏爾恭阿等迎勞丙子命長齡管理藩院秋
七月甲辰朝鮮國王李熙以回疆平定遣使表賀進方物丙午以昇寅爲熱河
都統以那清安署禮部尙書八月丁丑萬壽節停止筵宴己卯以成格爲熱河
都統調盧坤爲廣東巡撫以徐忻爲山西巡撫甲申命奕紹托津富俊陳若霖

留京辦事是月給浙江淳安等四縣水災口糧貸長蘆被淹竈戶工本蠲緩浙
江淳安等四縣新舊額賦九月戊戌朔日食丙午上謁東陵免經過地方額賦
十分之三丁未以寶華峪工程不慎褫英和職降戴均元三品頂戴己酉謁昭
西陵孝陵孝東陵景陵裕陵並祭孝穆皇后殯宮褫戴均元職庚戌謁裕陵行
大饗禮辛亥下英和於獄籍其家癸丑上還圓明園甲寅上謁西陵免經過地
方額賦十分之三丁巳謁泰陵泰東陵昌陵戊午謁昌陵行大饗禮庚申逮戴
均元下獄籍其家辛酉上還圓明園調特依順保爲黑龍江將軍以那彥寶爲
綏遠城將軍達凌阿爲塔爾巴哈臺參贊大臣是月賑兩淮海州屬中正等三
場竈戶水災貸回疆西四城兵丁茶價銀冬十月庚午英和遣戍黑龍江甲午
復悼郡王綿愷爲悼親王是月賑江蘇海州等三州縣衛浙江建德等五縣水
災給江蘇高郵等九州縣安徽泗州等二十六縣水災旱災一月口糧貸奉天
廣甯等處水災旗民口糧浙江富陽縣貧民穀石齊齊哈爾等處旗營官莊銀
糧蠲緩江蘇海州等三十六州廳縣衛安徽泗州等二十六州縣浙江海甯等

十三州縣旱災水災新舊額賦十一月甲辰上皇太后徽號曰恭慈安豫康成皇太后乙巳以加上皇太后徽號禮成頒詔天下覃恩有差己未釋戴均元是月賑浙江富陽縣水災給盛京寧古塔等處水災口糧十二月辛巳那彥成奏招降附霍罕之額提格訥部落諭嘉之令妥爲撫馭是歲琉球朝鮮入貢

九年春正月丁未皮察克布魯特阿仔和卓來降壬子楊芳加太子太傅是月給安徽泗州等五州縣並屯坐衛江蘇海州等十五州縣衛災民口糧賑兩淮板浦等三場被災貧丁貸山西代州解州水災籽種河南上蔡縣水災倉穀二月己巳御經筵庚午上奉皇太后幸圓明園霍罕西南達爾瓦斯部落遣使內附諭嘉獎卻之甲午命吉林將軍博啓圖爲御前大臣以瑚松額代之三月丙午上幸南苑丁未上行圍至辛亥皆如之辛亥西藏徼外拉達克部長呈進奏表壬子上還圓明園甲寅上御閱武樓閱京營兵戊午召琦善以訥爾經額爲山東巡撫朱桂楨爲漕運總督夏四月癸酉召戴三錫以琦善爲四川總督壬午屠之中以讞獄錯誤降松筠署直隸總督丙戌奉皇太后御舍輝樓閱皇子

及侍衛等騎射戊子賜李振鈞等二百二十一人進士及第出身有差是月貸
湖南乾州等五廳州縣上年旱災口糶籽種山西朔州等二十三州廳縣歉收
倉穀五月丁酉移孝穆皇后梓宮於寶華峪正殿神牌於東配殿是月貸湖北
荊州城守水師二營及宜都營被水倉穀六月乙丑以福縣爲科布多參贊大
臣己巳免西藏喀喇烏蘇等處雪災番族貢馬銀並撫恤達木八旗被災官兵
戶口甲戌伊犁將軍德英卒以玉麟代之調松筠爲兵部尙書以博啟圖爲禮
部尙書丁丑召安福以福克精額署察哈爾都統是月貸三姓地方上年被水
倉穀七月己亥申嚴粵海關官銀出洋私貨入口禁以扎隆阿爲喀什噶爾參
贊大臣丁巳越南國王以母老乞養茂上嘉贊之是月賑廣西維容永福二縣
水災免安徽泗州五河縣鳳陽泗州二衛上年被水錢糧十分之一八月癸亥
以謁盛京祖陵命奕紹托津湯金釗明山留京辦事庚辰上奉皇太后謁盛京
祖陵九月壬辰朔日食免蹕路經過之承德等五廳州縣本年額賦及幫辦差
務之岫巖等九廳州縣額賦十分之五壬寅朝鮮貢使李相璜等迎覲乙巳上

親射並閱盛京官兵等騎射丁未上謁永陵戊申行大饗禮閱興京城己酉博
啓圖降調以耆英爲禮部尙書上謁福陵臨奠宏毅公額亦都慕加恩後裔博
克順等癸丑行大饗禮上至盛京詣太廟寶冊前行禮乙卯上詣天壇堂子奉
皇太后幸嘉蔭堂臨奠克勤郡王岳託墓朝鮮國王李琮遣使貢方物戊午詣
地壇臨奠直義公費英東墓己未上御大政殿賜扈從王公大臣蒙古王貝勒
貝子公及盛京文武官員宴賞有差十月以潘世恩署禮部尙書辛未皇太后
聖壽節上率扈從王公大臣詣皇太后行宮行慶賀禮上奉皇太后幸澄海樓
壬午謁裕陵甲申以吳光悅爲江西巡撫乙酉上奉皇太后還宮是月給安徽
泗州等五州縣衛一月口糧十一月丁巳召英惠調成格爲烏魯木齊都統以
裕恩爲熱河都統是月賑奉天遼陽等五處被災旗民口糧十二月甲子緬甸
國王孟既遣使表賀乙亥撫恤西藏三十九族被災番民是月賑山東益都臨
朐二縣地震災獨直隸隆平甯管二縣窪地額賦之五

十年春正月丁巳暹羅國王鄭福遣使表賀並貢方物是月賑江蘇沛縣安徽

盱眙等六州縣衛旱災水災貸直隸滄州鹽山二州縣甘肅皋蘭等十四州縣旱災水災銀穀二月壬戌上御經筵丁卯命緝捕河南梟匪捻匪丁丑命緝捕江西上猶縣會匪三月庚寅以謁西陵命奕紹托津長齡盧蔭溥留京辦事己亥免湖南澧州濱湖淤田額賦並前借籽種銀壬寅上奉皇太后謁西陵以昇寅爲綏遠城將軍甲辰調瑚松額爲盛京將軍以福克精阿爲吉林將軍武忠額爲察哈爾都統丙午上謁秦陵秦東陵昌陵己酉上幸南苑庚戌上行圍至壬子如之壬子以哈薩克汗阿勒坦沙喇等請遣其子入覲命至熱河陛見四月辛未申禁外省才不勝任之員改京職五月辛酉河南直隸毗連十四州縣地震命加意撫恤六月辛卯蔣攸銛有疾以陶澍署兩江總督乙未以程祖洛爲湖南巡撫七月丙子暹羅遣使賀萬壽貢方物免江蘇海州四州縣舊欠額賦八月乙未萬壽節停筵宴庚戌召蔣攸銛來京授陶澍兩江總督調盧坤爲江蘇巡撫以朱桂植爲廣東巡撫命吳邦慶以三品銜署漕運總督是月加賑湖北監利等四縣水災戊午安集延回匪復入喀什噶爾幫辦大臣塔斯哈戰

敗死之遂圍喀什噶爾城命玉麟等往勦命楊遇春駐肅州楊芳胡超率陝甘兵協勦以鄂山署陝甘總督徐忻署陝西巡撫阿勒精阿署山西巡撫己未以楊遇春爲欽差大臣督辦軍務以英惠署黑龍江將軍丁卯命長齡爲欽差大臣率桂輪阿勒罕保等赴新疆辛未以玉英署黑龍江將軍乙亥上閱火器營兵丁丑大學士蔣攸銛以讞獄誤降侍郎召徐忻來京以顏伯燾署陝西巡撫以盧蔭溥爲大學士李鴻賓協辦大學士仍留兩廣總督任調湯金釗爲吏部尙書王引之爲禮部尙書潘世恩爲工部尙書朱士彥爲左都御史是月賑直隸磁州等三州縣地震災四川彭城等二縣水災十月以盧蔭溥爲體仁閣大學士戊子以富呢揚阿爲浙江巡撫乙未仍授長齡爲揚威將軍命哈喇阿楊芳參贊軍務庚子以樂善爲烏里雅蘇台將軍辛丑以軍事遲誤褫伊犁參贊大臣容安職並所襲子爵壬寅以恩銘爲烏里雅蘇台參贊大臣癸卯回匪犯葉爾羌壁昌等擊敗之丁未逮容安壬子召富呢揚阿來京是月賑直隸大城文安等縣災民給安徽蕪湖等五州縣衛口糧貸黑龍江等三處旗民倉穀甘

肅皋蘭等十一州縣貧民口糴十一月以楊懌曾爲湖北巡撫乙亥申諭李鴻
寶等查辦廣東會匪丁丑諭吳光悅查辦江西贛南會匪壬午嵩孚降調以富
坤爲湖廣總督調程祖洛江蘇巡撫蘇成額湖南巡撫以祁埏爲廣西巡撫以
阿勒精阿爲江西巡撫是月賑河南安陽等三縣地震災給江西廬陵縣水災
修屋費十二月癸巳托津免管刑部以盧蔭溥代之丙申喀什噶爾英吉沙爾
回匪平子死事喀什噶爾幫辦大臣塔斯哈都統銜是月賑雲南密我縣水災
貸江蘇蘇州等四府州屬駐近災區兵丁銀米

宣宗本紀二

十一年春正月辛酉扎隆阿免以哈喇阿揚芳護理喀什噶爾參贊大臣乙丑容安論斬丙子以魏元烜爲福建巡撫朝鮮國王李瑛請封其孫奐爲世孫貢方物是月給江蘇沛縣安徽蕪湖等八州縣衛浙江富陽縣被災口糧貸三姓雙城堡兵民直隸磁州等九州縣湖南安鄉華容二縣河南武安縣甘肅會寧等五縣被災口糧屋費籽種蠲緩吉林等四處兵民新舊額賦二月己丑御經筵辛卯以謁西陵命奕紹等留京辦事那彥成以驅逐安集延回民啓衅褫太子太保並褫其子容照侍郎乙未褫那彥成職調琦善爲直隸總督王鼎署以鄂山爲四川總督那彥寶署史譜爲陝西巡撫戊戌申禁各省種鴉片辛丑上謁西陵乙巳謁泰陵泰東陵昌陵上閱視萬年吉地賜名龍泉峪丙午上再謁昌陵行敷土禮御隆恩殿行大饗禮是月貸湖北荆門營上年被水兵丁倉穀三月癸丑朔釋英和並其子奎照奎耀回京廣東黎匪作亂命李鴻賓勦之

辛酉以廣東貿易英吉利人違禁令命李鴻寶等查復是月貸湖北督標撫標暨武昌黃州各營兵丁倉穀夏四月戊子上閱健銳營兵癸卯上詣黑龍潭神祠祈雨廣東黎匪平五月丙寅湯金釗緣事降並罷上書房總師傅調潘世恩爲吏部尙書朱士彥工部尙書白鎔都察院左都御史戊辰命長齡赴喀什噶爾商辦勦撫及善後事宜辛未雨七月丙申定官民買食鴉片煙罪例己亥賑安徽泗州等二十五州縣水災庚戌以湖北沔陽等二十州縣水災命平糶倉穀免湖北關津米稅是月給江蘇上元等九縣衛水災口糧貸江蘇淮安衛災屯籽種秋七月戊午命陶澍偕程祖洛辦江蘇災賑以安徽水災准鄧廷楨買鄰省米麥平糶並備兵糶癸酉以誣陷回王伊薩克叛逆扎隆阿論斬辛未移回疆參贊大臣及和闐領隊大臣駐葉爾羌添設總兵駐巴爾楚克己卯命穆彰阿朱士彥往江南查辦賑務是月給湖南武陵等五州縣貴州桐梓縣石覘衛水災口糧貸江蘇江甯等六營災區兵餉八月己丑萬壽節上詣皇太后宮行禮御正大光明殿王以下文武各官蒙古王公外藩使臣等行慶賀禮停

筵宴辛卯首長齡太傅乙未松筠病免調穆彰阿兵部尙書富俊工部尙書以博啟圖爲理藩院尙書辛丑暹羅國王遣貢使載內地遭風官民回廣東溫諭獎賚之癸卯以保昌爲熱河都統以吳榮光爲湖南巡撫是月給江蘇甘泉等十一州縣湖北江夏等十六州縣江西德化等二十縣水災口糧籽種貸江南江甯駐防及溧陽營兵米九月甲子福克精阿緣事褫職以寶興爲吉林將軍丁丑越南國王遣使送遭風難民回福建溫諭獎賚之冬十月嚴煇病免以林則徐爲河東河道總督乙未命裁留江西漕米八萬石賑南昌九江飢民己丑改喀什噶爾幫辦大臣爲領隊大臣乙未裁留江西漕米八萬石賑南昌九江飢民是月賑安徽無爲等二十三州縣銜江蘇上元等二十六州縣浙江仁和等七縣銜兩淮丁谿等六場水災給安徽桐城等十州縣湖南武陵等五縣江西德化縣口糧修屋費貸甘肅皋蘭等十八州廳縣口糧湖南武陵龍陽二縣民隄修費十一月丙辰大學士托津病免授吳邦慶漕運總督己巳松筠罷內大臣降三品頂戴休致是月貸奉天鐵嶺等五州廳及巨流河四處口糧江西

南昌等六縣修隄費獨緩寄古塔雙城堡災霜災新舊額賦十二月乙酉以富俊爲大學士管兵部文孚協辦大學士調穆彰阿爲工部尙書以那清安爲兵部尙書昇寅爲都察院左都御史彥德爲綏遠城將軍乙巳以吳邦慶爲江西巡撫蘇成額爲漕運總督是月展賑湖北江夏等十六州縣水災給江蘇上元等二十五州縣衛及丁谿十五場水災口糧貸江蘇鎮江等二十七營湖南常德澧州各營水災兵餉

十二年春正月辛酉免浙江杭州等三府商船米稅丁卯陳若霖免以戴均元署刑部尙書癸酉王引之丁憂以汪守和爲禮部尙書是月賑安徽懷甯等二十一州縣水災旱災並給懷甯等十七縣衛貧民口糧貸直隸大名等四州縣河南商邱等三縣災民米穀陝西葭州等四州縣江西南昌等十六縣湖北江夏等二十州縣衛湖南武陵等十州廳縣衛甘肅渭源等七州縣貴州桐梓縣災民口糧籽種二月戊寅湖南江華縣縣賊趙金龍作亂命盧坤等勦之己卯御經筵甲申梁中靖奏查辦邪教株連冤抑諭斥之辛卯鍾昌降調授戴均元

刑部尙書乙未閩浙總督孫爾準卒以程祖洛爲閩浙總督林則徐爲江蘇巡撫吳邦慶爲河東河道總督周之琦爲江西巡撫內申命李鴻寶勦擒賊壬寅以謁東陵命奕紹等留京辦事三月己酉湖南提督海陵阿副將馬昭等勦擒賊于甯遠失利死之壬子上謁東陵免經過地方額賦十分之三乙卯上謁東陵孝陵孝東陵景陵裕陵丙辰召瑚松額以奕顛署盛京將軍己未上幸南苑行圍庚申召長齡癸亥上還京師庚午命戶部尙書禧恩赴湖南勦擒賊以文孚署戶部尙書是月展賑湖北江夏漢川二縣水災給安徽青陽縣災民口糧貸甘肅皋蘭等七州縣災民湖南乾州等五州縣屯丁口糧籽種湖北督標提標及武昌城守營被災兵丁倉穀夏四月癸巳祈雨戊戌兩辛丑賜吳鍾駿等二百六人進士及第出身有差乙巳盧坤等敗擒賊於羊泉盡殲之獲趙金龍子及賊首五十餘人是月再給江蘇揚州水災倉穀五月丁未減福建水陸各營及浙江馬步兵有差壬子以趙金龍已斃餘賊悉平賞盧坤羅思舉雙眼花翎一等輕車都尉世職加湖南提督余步雲太子少保乙卯教匪尹老須等伏

誅庚申上祈雨於黑龍潭戊辰上詣天神壇祈雨己巳詔刑部清釐庶獄是月
貸山西大同等三縣被災兵民倉穀六月庚辰上步詣社稷壇祈雨壬午求直
言丁亥上詣黑龍潭祈雨壬辰以廣東提督劉榮慶勦連州瑤賊失利褫職李
鴻賓褫職留任癸巳上步詣方澤祈雨乙未富俊以旱乞罷不允丙申霍罕遣
使進表歸所擄喀什噶爾回民丁酉復松筠頭品頂戴癸卯上自齋宮步詣園
丘行大雩禮是日雨甲辰命禧恩瑚松額自湖南赴廣東勦瑤賊是月貸江蘇
淮安衛水災屯田籽種秋七月丁未宥容安遣戍吉林戊申以鍾昌爲科布多
參贊大臣命程祖洛清理浙江鹽政和闐回塔瓦克等糾衆作亂捕誅之乙丑
廣西賀縣瑤盤均華等作亂祁項勦平之是月賑福建澎湖廳風災給湖北天
門縣水災口糧八月陶澍奏英船再入內洋或不遵約束當嚴懲諭以啓衅斥
之甲午李鴻賓褫職並提督劉榮慶逮問調盧坤爲兩廣總督命阮元協辦大
學士仍留雲貴總督任以訥爾經額爲湖廣總督鍾祥爲山東巡撫是月賑山
西朔州水災蠲緩安徽懷甯等二十九州縣衛上年水災旱災額賦九月甲辰

朔以尹濟源爲山西巡撫丙午南河龍窩汛隄盜決命穆彰阿會同陶澍查辦張井穢職留任丁未以英吉利船闖入內洋命沿海整飭水師甲寅以特依順保爲伊犁將軍戊午廣東連州瑤平湖南瑤趙幅金等伏誅是月給江蘇桃源縣湖北天門縣等七縣衡水災口糧貸山西山陰縣歉收倉穀閏九月丁亥上簡閱健銳營兵壬寅以朝鮮國王李琮卻英吉利貿易下詔褒獎之是月賑直隸阜平等十州縣災民貸河南祥符等七州縣陝西興安府水災口糧貸齊齊哈爾等處被旱兵丁銀穀冬十月乙巳廣東曲江乳源兩縣盜匪作亂勦平之丙午命朱士彥敬徵往江南查辦事件乙丑命穆彰阿至湖北會同訥爾經額查辦事件是月賑直隸吳橋東光二縣江蘇桃源等三州縣湖北漢川等四縣銜安徽五河縣兩淮板浦等三場水災旱災給江蘇海州等四州縣安徽五河等十一縣衛湖南安鄉華容二縣奉天錦州府屬旗民口糧貸山西大同鎮災區駐防倉穀蠲緩直隸吳橋等十七州縣江蘇桃源等六十三州廳縣衛安徽五河等三十九州縣衛浙江海甯等二十二州縣衛仁和場兩淮富安等十四

場湖南安鄉等七州縣衛山西隰州等六州縣湖北漢川等二十六州縣衛水災旱災雹災新舊額賦十一月戊寅命署福州將軍瑚松額爲欽差大臣都統哈頓阿爲參贊大臣赴台灣勦匪丙申撥京倉米一萬石賑順天府武清等八州縣災民丁酉李鴻賓遣戍烏魯木齊劉榮慶遣戍伊犁是月貸陝西漢中等五府州廳屬甘肅宜和縣被災口糧吉林等七處籽種蠲緩甘肅宜禾縣通租十二月甲辰撥浙江江西倉穀二十萬石濟福建民食丙午盧蔭溥予假命王鼎管刑部己巳以孝順俗爲科布多參贊大臣是月貸直隸災區各營兵餉山西豐鎮等六州廳縣災民倉穀是歲朝鮮南掌琉球暹羅入貢

十三年春正月丁丑臺灣嘉義匪首陳辦伏誅己卯昇寅等查覆西安將軍徐銀職款屬實褫職丁酉以麟慶爲湖北巡撫桃南廳決口合龍二月甲辰上御經筵己未四川越嶲等處夷匪作亂命那彥寶桂涵剿之庚申賑被災多倫諾爾租種蒙古地貧民並諭此後口外偏災不得撥請壬戌以汪守和兼署吏部尙書是月賑直隸薊州等七州縣災民貸陝西漢中等五府州廳貧民倉穀三

月丙子大學士盧蔭溥致仕辛巳上閱火器營兵內申盧坤奏獲越南盜陳加海等洋面肅清戊戌以麟慶爲江南河道總督以鄂順安爲湖北巡撫庚子兩是月貸直隸紫荆關營兵奉天錦州府屬兵丁湖南乾州等五廳縣屯丁苗佃倉穀夏四月壬寅調鄂順安爲山西巡撫尹濟源爲湖北巡撫樂善遷福州將軍調慶山爲烏里雅蘇台將軍丁未兩戌申瑚松額邊成都將軍調寶興爲盛京將軍保昌爲吉林將軍以蘇成額爲熱河都統貴慶爲漕運總督己酉命潘世恩爲體仁閣大學士管戶部調朱士彥爲吏部尙書以白鎔爲工部尙書湯金釗爲左都御史乙卯免道光十一年十二年喀什噶爾葉爾羌額貢己巳皇后佟佳氏崩是月貸盛京義州兵米湖南新田縣民糶籽種五月辛未朔賜汪鳴相等二百二十人進士及第出身有差丁丑楊芳勳越嶺夷匪大敗之進剿我邊夷匪己丑我邊匪首桑樹格等伏誅丁酉禧恩免御前大臣戶部尙書改爲理藩院尙書命大學士長齡管戶部潘世恩管工部調穆彰阿爲戶部尙書博啟圖爲工部尙書己亥四川我邊夷匪平六月庚子朔日食是月貸直隸博

野等三縣雹災籽種七月庚午甲申御試翰林詹事官擢田嵩年三員爲一等
餘升黜有差壬辰册諡大行皇后爲孝慎皇后調祁頊廣東巡撫以惠吉爲廣
西巡撫是月賑貴州古州等四廳縣水災八月是月賑貴州都江等二廳水災
九月庚午移孝慎皇后梓宮于田村上臨送乙亥管楊芳一等侯壬辰以貴慶
爲熱河都統調嵩溥爲漕運總督調史譜爲貴州巡撫以楊名颺爲陝西巡撫
甲午免雲南昆明等十州縣地震災本年額賦並賑之是月賑江蘇上元等六
縣水災十月戊午調布彥泰爲伊犁參贊大臣常德爲塔爾巴哈台參贊大臣
己未以湯金釗爲工部尙書史致儼爲左都御史是月賑江蘇上元等十二縣
衛湖南安鄉華容二縣直隸曲陽縣黑龍江三處災民賑湖北武昌等六縣水
災給安徽懷遠等六縣災民口糧十一月丙戌上詣大高殿祈雪以裕泰爲貴
州巡撫丁亥以武忠額爲熱河都統以凱音布署察哈爾都統十二月丁巳減
免直隸河間等五縣水淹地賦是月賑江蘇上元等十二縣衛水災是歲朝鮮
越南琉球緬甸入貢

十四年春正月丁卯朔辛未文孚免正黃旗領侍衛內大臣以載銓代之丁丑
緬甸貢使聶紐耶公那牙卒於京師庚辰廣東僑州黎匪作亂飭盧坤勦之甲
申以浙江杭州等府災免外商及浙民運米關稅福建永安等縣土匪擄人勒
贖捕治之允浙江杭州湖州兩府所屬漕糧紅白兼收秬稷並納丁亥命潘世
恩在軍機大臣上行走戊子以三載考績予長齡等議叙命松筠以都統銜休
致祁垣奏越南諒山解圍七泉夷州知州阮文泉等求入關拒之是月賑直隸
曲陽縣貧民給江蘇上元等八縣浙江海甯等四州縣江西南昌等二十二縣
上年災歉口糧籽種貸山西朔州等十州縣陝西葭州等十四州廳縣江西南
昌等六縣湖北武昌等十八州縣衛湖南澧州等四州縣甘肅皋蘭等九州廳
縣上年被災倉穀口糧籽種二月丙申朔朱士彥給假省親以湯金釗署吏部
尚書改巴克楚克換防總兵爲副將己亥上御經筵癸卯昇寅等查辦山東河
南事件以敬徵署左都御史乙巳釋李鴻賓劉榮慶回籍丙午以江蘇糧價增
昂免四川湖廣商米各關船稅戊申以廣東學政李泰交自縊命盧坤徹查己

酉定山東運河查泉章程庚戌以謁西陵命奕紹等留京辦事壬子命凱音布查辦烏里雅蘇台事件以蘇勒通阿署察哈爾都統辛酉朱士彥憂免調湯金釗爲吏部尙書以汪守和爲工部尙書史致儼爲禮部尙書何凌漢爲左都御史乙丑大學士富俊卒是月給江蘇上元等八縣衛上年被災口糧貸貴州古州廳上年被災籽種三月庚午明山病免以成格爲刑部尙書那清安兼署以長清爲烏魯木齊都統興德爲集爾羌參贊大臣癸酉上謁西陵詣田村孝慎皇后梓宮前奠酒免經過額賦十分之三丁丑上謁泰陵泰東陵昌陵庚辰上還京師壬午上臨故大學士富俊第賜奠乙酉以喀爾喀游牧被災准凱音布請緩勘地界免四川夷匪滋擾之清溪等三廳縣並甯越越嵩兩營上年額賦夏四月丁酉以給事中黃爵滋奏命各省督撫興復書院選擇山長查保甲修水利籌積貯嚴禁扣餉派兵積弊查究偷漏洋稅并禁紋銀出洋及私鑄洋銀戊戌除直隸樂亭縣水衝官地租賦丁未儀郡王綿志卒甲寅臨故儀順郡王綿志第賜奠以其子奕綱襲貝勒丁巳命侍郎趙盛奎在籍前河督嚴烜會同

富呢揚阿查勘浙江塘工辛酉以蘇清阿爲伊犁參贊大臣甲子上詣田村孝
慎皇后梓宮前行周年祭禮是月貸山西岳陽等十二州廳縣歉收民屯倉穀
五月己巳以恩銘署漕運總督壬申授凱音布察哈爾都統癸酉免雲南昆明
等十州縣上年地震災賦辛巳上至田村孝慎皇后梓宮前奠酒丙戌命盧坤
等驅逐英吉利販鴉片蓋船勿任停泊庚寅修山東闕里至聖孔子林廟甲午
申諭多爾濟喇布坦等與俄羅斯交涉事件務遵舊章是月貸淮安大河二衛
歉收屯田籽種六月戊申以福建省城水災准運古田福清二縣倉穀及廈門
商販米平糶癸丑以鄂爾多斯達拉特旗私租蒙地民人拒捕傷台吉命鄂順
安捕治之壬戌實授恩銘漕運總督是月蠲緩葉爾羌等三城回戶通糧秋七
月乙丑飭查漕運虧短積弊並申禁京城私販接濟回漕丁卯博啟圖給假以
奕顯署上部尙書戊辰霍罕伯克以准通商免稅遣使表貢並請年班入覲允
之庚午命蘇清阿查勘巴爾楚克喀什噶爾墾田免福建台匪滋擾之四縣暨
淡水廳抄叛各產租穀壬申命特依順保等妥議沿邊會哨章程祖洛奏獲

洋盜劉四等誅之甲戌四川我邊廳支夷作亂命瑚松額楊芳等查辦賑江西水災內子工部尙書博啟圖卒調耆英爲工部尙書昇寅爲禮部尙書敬徵爲左都御史壬午以桂良爲河南巡撫戊子東河朱家澗決口是月賑江西南昌等十三縣水災給湖南武陵等七縣衛被水軍民口糧並修屋費八月己酉改建浙江北海塘爲石塘癸丑以武忠額爲烏里雅蘇台將軍倫布多爾濟署以嵩溥爲熱河都統庚申四川我邊支夷平盧坤奏英商勞卑來粵致書稱大英國請暫停貿易論是之辛酉上詣孝慎皇后梓宮前奠茶酒是月賑盛京蓋州等三處浙江建德淳安二縣江西南昌等二十五縣水災貸甘肅皋蘭等六縣旱災倉穀蠲緩江西南昌等二十五州縣新舊額賦九月乙丑英吉利兵船入廣東內河礮盧坤職留任庚午上閱健銳營兵癸酉英吉利兵船出口復盧坤太子少保仍革職留任是月賑直隸宛平等七州縣水災奉天新民等四州縣廳水災貸廣東廣州肇慶二府水災籽種打牲烏拉被水旗民倉穀蠲緩直隸大城等五十一州縣山西太原縣水災新舊額賦十月己酉立皇貴妃鈕祜祿

氏爲皇后頒詔加恩有差壬子上皇太后徽號曰恭慈安豫康成莊惠皇太后
頒詔覃恩有差辛酉那清安病免以敬徵爲兵部尙書奕穎爲左都御史是月
賑湖北黃梅等三縣衛湖南安鄉等四縣衛水災貸甘肅皋蘭等八州縣旱災
雹災口糧十一月乙丑調汪守和爲禮部尙書史致儼爲工部尙書壬申禮部
尙書昇寅卒以奕穎爲禮部尙書恩銘爲左都御史調朱爲弼爲漕運總督丙
子以棍楚克策楞爲塔爾巴哈台參贊大臣己卯刑部尙書戴敦元卒調史致
儼代之以王引之爲工部尙書庚辰以烏爾恭額爲浙江巡撫丙戌以文孚爲
大學士管吏部調穆彰阿爲吏部尙書協辦大學士耆英爲戶部尙書敬徵爲
工部尙書奕穎爲兵部尙書以載銓爲禮部尙書工部尙書王引之卒丁亥以
何澂漢爲工部尙書吳椿爲左都御史是月賑浙江麗水縣水災蠲緩浙江建
德等十六州縣衛水災新舊額賦十二月癸巳崔罕復侵色埒庫勒命興德等
諭之命文孚爲東閣大學士丙申四川綏邊夷匪復叛降楊芳二等侯褫御前
侍衛以總兵候補甲辰黑龍江將軍富僧德調西安將軍以奕經代之癸丑上

諸大高殿祈雪是月貸直隸災區各營兵餉江甯八旗官兵銀米廣東南海等九縣籽種並圍基修費是歲朝鮮琉球緬甸暹羅入貢

十五年春正月甲子大學士曹振鏞卒壬午長齡以受崔罕餽送罷御前大臣管戶部事丙戌陝甘總督楊遇春致仕仍溫諭來京以瑚松額爲陝甘總督調寶興成都將軍以奕經爲盛京將軍保昌爲黑龍江將軍蘇清阿爲吉林將軍是月賑奉天牛莊等三處被災旗戶給江西南昌等九縣甘肅靖遠等六州縣口糧貸山西太原等三州縣江西南昌等二十六州縣湖南安鄉等四州縣甘肅秦州靖遠縣被災倉穀籽種二月丙申以阮元爲大學士管刑部王鼎協辦大學士伊里布爲雲貴總督何煊爲雲南巡撫庚子以奇明保署黑龍江將軍丁未命長齡管理藩院文孚管戶部潘世恩管工部阮元改管兵部王鼎管刑部以朝鮮世孫李奐襲封朝鮮國王戊午吉林將軍蘇清阿卒調保昌代之以祥康爲黑龍江將軍三月山西趙城縣匪曹順作亂知事楊延亮死之遂圍霍州命鄂順安勦辦丙子上行圍至己卯皆如之庚辰上還圓明園是月給甘肅

皋蘭等五州縣應災歎口糧夏四月四川綏邊支夷平晉鄂山太子太保賞雙
眼花翎甲寅賜劉繹等二百七十六人進士及第出身有差丁巳上詣黑龍潭
神祠祈雨五月丁卯致仕陝甘總督楊遇春晉封一等侯子食全俸辛未趙城
縣匪首曹順等伏誅丁丑上復詣黑龍潭神祠祈雨以栗毓美爲河東河道總
督庚辰雨是月貸山西鳳台沁水二縣被旱倉穀六月丙午減江蘇丹徒被水
蘆田額賦閏六月丁卯敬徵降調以載銓爲工部尙書恩銘爲禮部尙書武忠
額爲左都御史調保昌爲烏里雅蘇台將軍祥康爲吉林將軍哈豐阿爲黑龍
江將軍己巳停本年秋決秋七月甲辰文孚免軍機大臣仍命以大學士管吏
部改潘世恩管戶部穆彰阿管工部命刑部右侍郎趙盛奎工部右侍郎賽尙
阿在軍機大臣上學習行走是月給陝西沔縣洛川縣被水湖南華容等三縣
衛被旱口糧八月甲子以皇太后六旬萬壽普免各省通賦庚辰諭科道中馮
贊勳金應麟黃爵滋曾望顏擢任京卿所以廣開忠諫務當不避嫌怨於民生
國計用人行政闕失仍隨時據實直陳以資採納兩廣總督盧坤卒以鄧廷楨

爲兩廣總督祁埏署色下星額爲安徽巡撫甲申上謁西陵是日移孝慎皇后梓宮由田村啟行免經過地方額賦十之五是月給陝西府谷縣雹災口糧九月己丑孝穆皇后孝慎皇后梓宮至龍泉峪上臨奠庚寅上回鑾戊戌授麟慶江南河道總督丙午朱爲彌病免以恩特亨額爲漕運總督是月給兩淮板浦中正二場被水甃丁口糧緩徵陝西榆林縣葭州雹災江西金谿等九縣旱災額賦冬十月戊午以毓書爲科布多參贊大臣甲子以皇太后六旬聖壽上徽號曰恭慈康豫安成莊惠壽禧皇太后乙丑皇太后六旬聖壽節上率王公大臣詣壽康宮行慶賀禮上御太和殿羣臣進表行慶賀禮詔天下覃恩有差以富呢揚阿爲烏魯木齊都統癸未御史湯鵬以劾載銓忤旨罷予告大學士托津卒是月給山西陽曲等五州縣湖南岳州衛州浙江海甯等十三州縣被災口糧貸奉天金州水師營兵穀獨緩湖南華容等十四州縣衛浙江海甯等三十一州縣衛被災新舊額賦雜款十一月戊戌臨大學士託津第賜奠是月給吉林等三處歉區口糧十二月己未上再詣高殿祈雪乙丑孝穆皇后孝慎

皇后梓宮奉安地宮乙亥以樂善爲吉林將軍是月貸江蘇撫標及城守劉河二營災區兵餉蠲緩貴州松桃廳被水額賦是歲朝鮮琉球來貢

十六年春正月乙未以車倫多爾濟爲庫倫蒙古辦事大臣壬寅撥山東司庫銀五萬兩賑登萊青三府飢乙巳調裕泰爲湖南巡撫以賀長齡爲貴州巡撫是月賑浙江義烏等三縣水旱災給奉天廣甯等處水災旗民口糧貸甘肅金州等十四州縣江西蓮花等五十一廳縣陝西葭州等九州廳縣湖南澧州等四州縣山西保德等十五州縣水旱雹災口糧籽種倉穀二月丙辰調周之琦爲湖北巡撫以陳鑾爲江西巡撫己未以謁東陵命肅王等留京辦事己巳上閱火器營兵癸酉上謁東陵免經過地方額賦十分之三丙子上謁昭西陵孝陵孝東陵景陵裕陵湖南武岡州匪藍正樽等作亂命吳榮光會同訥爾經額勦之戊寅免四川荻邊廳逋賦己卯上還京師夏四月癸亥以梁章鉅爲廣西巡撫丁丑賜林鴻年等一百七十二人進士及第出身有差是月貸甘肅秦州等八州縣被災口糧五月丙申上詣黑龍潭祈雨戊戌禮部尙書汪守和卒以

吳椿爲禮部尙書李宗昉爲左都御史丁未上詣靜明園龍王廟祈雨是月貸直隸寶坻縣歉收口糧秋七月癸未以鍾祥爲閩浙總督經額布爲山東巡撫乙酉以哈豐阿舉發都統高喀加鼎千預公事書信加太子太保己丑高喀加鼎禡職遣戍熱河丙申大學士文孚致仕庚子命穆彰阿爲大學士管工部琦善協辦大學士仍留直隸總督任調耆英爲吏部尙書奕顯爲戶部尙書禧恩爲兵部尙書武忠額爲理藩院尙書凱音布爲左都御史樂善爲察哈爾都統壬寅恩銘免尙書都統趙盛奎免軍機大臣及侍郎以貴慶爲禮部尙書九月壬辰以富呢揚阿爲陝西巡撫廉敬爲烏魯木齊都統庚子上閱健銳營兵戊申圓明園三殿災己酉以耆英受太監屬託禡尙書都統內務府大臣以奕經爲吏部尙書寶興爲盛京將軍左都御史凱音布遷成都將軍以敬徵代之是月賑盛京白旗堡等處山西朔州等十一州廳縣貴州松桃廳災民展賑陝西神木縣災民蠲免山西朔州等十一州廳縣陝西榆林府屬被災新舊額賦冬十月丙辰加長清太子太保貸甘肅涇州等八州縣山西山陰縣災歉口糧倉

穀籽種蠲緩直隸景州等十二州縣水旱災新舊額賦十一月壬午以敬徵爲工部尙書調武忠額爲左都御史以奕紀爲理藩院尙書癸卯上詣大高殿祈雪是月給陝西府谷等四縣霜雹災口糧蠲緩直隸安州等三州縣水災額賦十二月丁巳上再詣大高殿祈雪癸亥雪是歲朝鮮暹羅來貢

十七年春正月己卯朔命奕紀爲御前大臣賞長齡四開襖袍加潘世恩太子太保壬辰兵部尙書王宗誠卒以朱士彥代之丁酉山東濰縣教匪馬剛等作亂捕獲之庚子降訥爾經額湖南巡撫以林則徐爲湖廣總督調陳鑾爲江蘇巡撫裕泰爲江西巡撫是月貸山西朔州等十一州廳縣陝西葭州等九州縣甘肅金州等十三州縣水災旱災蝗災雹災霜災倉穀口糧籽種二月乙卯福建臺灣縣教匪沈知等作亂捕誅之是月貸山西吉州等七州縣倉穀三月戊寅朔以詣學警山命惇親王綿愷等留京辦事庚寅上奉皇太后幸學警山免經過地方本年額賦十分之三甲午上奉皇太后還圓明園以耆英爲熱河都統乙未上詣明陵丙申上詣明長陵獻陵泰陵景陵永陵奠酒以明裔延恩侯

書桂爲散秩大臣丁酉上還圓明園夏四月庚申命彥德鞫治茂明安署札薩克貝勒丹丕勒等訐控盟長之獄甲子以顏伯燾爲雲南巡撫是月貸山東濮州等二十四州縣衛山西甯武縣倉穀五月戊寅賞慶病免調奕紀爲禮部尙書以武忠額爲理藩院尙書奎照爲左都御史以周天爵署漕運總督六月庚戌以御史朱成烈奏廣東海口每歲出銀三千餘萬福建浙江江蘇各海口出銀不下千萬天津海口出銀亦二千餘萬命沿海各督撫及各監督嚴飭稽查戊午命左都御史奎照戶部侍郎文慶在軍機大臣上學習行走己未命琦善署直隸總督壬申四川馬邊廳夷匪作亂命鄂山勦之甲戌奕山等奏獲雀罕賊目阿達那等誅之是月貸江蘇淮安大河二衛被災籽種秋七月丙子朔命侍郎倭什納等册封朝鮮王妃壬午樂善遷荊州將軍以賽尙阿爲察哈爾都統辛卯諭栗毓美東河甄工改辦碎石丁巳西甯辦事大臣穆楞額遷荊州將軍以蘇勒芳阿代之甲戌廓爾喀年貢逾例溫諭卻之九月庚寅授周天爵漕運總督癸巳召訥爾經額來京甲午以錢寶琛爲湖南巡撫甲辰免直隸邢臺

阜城二縣被旱額賦十分之五冬十月丙午上臨大學士長齡第視疾辛未停
吉林珠貢是月給陝西保安縣被災籽種口糧並貸綏德等四州縣倉穀獨綏
山西應州等十州縣齊齊哈爾等三城被災新舊額賦十一月辛卯皆封長齡
一等威勇公是月貸甘肅金州等九州縣貧民江西南昌等十三縣陝西葭州
等五州縣被災籽種口糧倉穀十二月丁未涼山夷匪平己巳李宗昉憂免以
卓秉恬爲左都御史庚午彥德以年老留京以棍楚克策楞爲綏遠城將軍是
月貸陝西定邊安定二縣來春口糧籽種是歲朝鮮琉球暹羅越南來貢

十八年春正月甲戌朔命奎照文慶爲軍機大臣乙亥太傅大學士一等公長
齡卒丙子上臨長齡第賜奠乙酉四川夷匪平是月貸甘肅固原等十四州廳
縣山西平定等五州縣災民口糧籽種倉穀二月癸卯朔命琦善爲大學士仍
署直隸總督以雲貴總督伊里布協辦大學士仍留任乙巳史致儼病免以祁
埏爲刑部尚書怡良爲廣東巡撫壬戌修喀喇沙爾城戊辰修浙江海塘是月
貸陝西懷遠府谷二縣歉收籽種三月乙亥以謁陵命肅親王等留京辦事戊

子上奉皇太后謁西陵免經過地方額賦十分之三壬辰上謁泰陵泰東陵昌陵詣孝穆皇后孝慎皇后陵寢奠酒乙未上奉皇太后還京師丙申上幸南苑行圍至戊戌皆如之庚子上還京師辛丑噶勒丹錫埒圖薩瑪第巴克什入貢是月貸山西遼州等十三州廳縣上年歉收倉穀夏四月庚申以富呢阿等建烏魯木齊書院議處有差申命新疆將軍都統大臣認真教練使人人習於戰陣毋舍實政務虛名甲子以伍長華爲湖北巡撫丙寅賜鈕福保等一百九十四人進士及第出身有差辛未以奕山爲伊犁將軍端多布爲伊犁參贊大臣閏四月丙子上詣黑龍潭祈雨辛巳兩鴻臚寺卿黃爵滋奏請將內地吸食鴉片者俱罪死命盛京吉林黑龍江將軍直省督撫各抒所見議奏己丑褫禧恩太子太保銜兵部尙書調成格爲兵部尙書以鄂山爲刑部尙書寶興爲四川總督耆英爲盛京將軍惠吉爲熱河都統庚寅調奕紀爲戶部尙書成格爲禮部尙書奕顥爲兵部尙書五月丙午上詣黑龍潭祈雨己酉雨癸丑大學士阮元致仕命王鼎爲大學士仍管刑部湯金釗爲戶部尙書協辦大學士朱士彥

爲吏部尙書卓秉恬爲兵部尙書姚元之爲左都御史戊辰惇親王綿愷免內
廷行走宗令劄親王俸三年六月辛未免四川馬邊雷波二廳逋賦及各廠應
解銅鉛丁丑降惇親王綿愷爲郡王己卯命湍多布爲塔爾巴哈台參贊大臣
關福爲伊犁參贊大臣是月給貴州鎮遠府屬被水兵民口糧秋七月戊申刑
部尙書鄂山卒以寶興爲刑部尙書蘇廷玉署四川總督八月丙戌以林則徐
等奏查獲烟販收繳烟具情形諭嘉之己丑成格免以奎照爲禮部尙書恩銘
爲左都御史命奕紀管理藩院以賽尙阿署理藩院尙書布彥泰爲察哈爾都
統九月給陝西安定府谷二縣災民口糧九月丙午莊親王奕寶等坐食鴉片
革爵丁未上閱健銳營兵已酉太常寺少卿許乃濟請弛鴉片禁命休致召林
則徐來京以伍長華署湖廣總督辛酉調錢寶琛爲江西巡撫裕泰爲湖南巡
撫吏部尙書朱士彥卒調湯金釗爲吏部尙書吳椿爲戶部尙書以喂守正署
禮部尙書是月給山東濰縣災民口糧冬十月庚寅以盛貴爲烏里雅蘇台參
贊大臣是月蠲緩直隸深州等十三州縣江西南昌等二十二縣安徽壽州等

三十四州縣衛河南內黃等十一縣湖南澧州等八州縣衛奉天寧遠州被災
新舊額賦十一月壬寅命伊里布等查禁雲南種罌粟壬子以寶興爲四川總
督恩銘爲刑部尙書裕誠爲左都御史癸丑命林則徐爲欽差大臣查辦廣東
海口事件節制該省水師以周天爵署湖廣總督鐵麟署漕運總督丁巳上詣
大高殿祈雪以固慶爲科布多參贊大臣乙丑兵部尙書奕穎褫職調裕誠爲
兵部尙書以隆文爲左都御史丙寅召哈豐阿來京以舒倫保署黑龍江將軍
是月賑陝西懷遠安定二縣寧古塔三姓地方兵民口糧十二月朔貴州仁懷
縣匪謝法眞等作亂命伊里布勦之辛未悼郡王綿愷卒追復親王爵上親臨
其喪三次賜奠乙亥上再詣大高殿祈雪丙戌上復詣大高殿祈雪庚寅移庫
倫幫辦大臣駐科布多爲科布多幫辦大臣辛卯授養尙阿理藩院尙書乙未
左都御史姚元之免以襲守正代之以匪亂平賞伊里布雙眼花翎晉余步雲
太子太保是歲朝鮮琉球暹羅來貢

十九年春正月戊戌朔晉封惠郡王繇愉爲親王戊午召奕山來京以關福署

伊犁將軍是月貸湖南武陵縣陝西葭州等九州縣甘肅固原等五州縣水旱災苞災口糧籽種二月壬午御試翰林詹事等官擢李國杞四員爲一等餘升黜有差丙戌以謁東陵命肅親王敬敏等留京辦事命林則徐赴虎門澳門防外海洋船進口及內匪出洋三月庚子上謁東陵免經過地方額賦十分之三辛丑吳椿病免調何淩漢爲戶部尙書以陳官俊爲工部尙書龔守正爲禮部尙書廖鴻荃爲右都御史癸卯上謁昭西陵孝陵孝東陵景陵裕陵詣端慧太子園寢奠酒乙巳陶澍病免調林則徐爲兩江總督以陳鑾署之裕謙署江蘇巡撫以桂良爲湖廣總督朱樹爲河南巡撫丙午上幸南苑行圍辛亥上還京師乙卯林則徐等奏疊船呈繳煙土諭嘉之子獎叙准林則徐等奏暫緩議斷互市烏魯木齊都統廉敬遷成都將軍以惠吉代之以恩銘爲熱河都統隆文爲刑部尙書丙辰以鐵麟爲左都御史夏四月辛未以吳文鎔爲福建巡撫丁丑調周天爵爲河南巡撫朱樹爲漕運總督戊子上詣萬壽山殿祈雨丁酉以直隸早免奉天山東河南來直米稅五月辛丑兩予告大學士盧蔭溥卒是月

賑雲南浪穹鄧川二州縣地震災額賦六月丙寅閩浙總督鍾祥以關防被竊
褫職以周天爵代之以牛鑑爲河南巡撫丁亥太子少保前兩江總督陶澍卒
辛卯調周天爵爲湖廣總督秋七月壬子命林則徐以禁販鴉片檄諭英吉利
國及各國在粵洋商是月給湖南華容縣水災口糧八月庚午經額布邊成都
將軍以托渾布爲山東巡撫召烏里雅蘇台將軍保昌來京以廉敬代之是月
給陝西葭州等三州縣被災口糧九月庚子命托渾布查辦山東登州海賊整
頓水師辛丑上閱健銳營兵己酉哈豐阿遷廣州將軍調棍楚克策楞爲黑龍
江將軍德克金布爲綏遠城將軍冬十月山西巡撫申啓賢卒賜卹如尙書例
以楊國楨爲山西巡撫是月賑安徽無爲等十一州縣及屯坐各衛水災賑湖
北黃梅等三縣災民給湖北沔陽等九州縣山東蒙陰縣陝西府谷神木二縣
湖南華容縣九州衛水災旱災口糧蠲緩安徽無爲等三十二州縣湖北沔陽
等二十六州縣河南睢州等二十一州縣湖南澧州等九州縣衛水災新舊額
賦十一月庚子英船入廣東海港林則徐督官軍擊走之停其貿易以程懋來

爲安徽巡撫戊申德克金布遷廣州將軍以松溥爲綏遠城將軍舒倫保爲黑龍江將軍庚戌命濟克默特赴庫倫迎哲布尊丹巴呼圖克圖來覲是月給江西德化等七縣山西應州等四州縣災民口糧蠲免江西南昌等二十三縣山西應州等八州縣直隸安州等五州縣被災新舊額賦十二月癸亥署兩江總督陳鑾卒調鄧廷楨爲兩江總督林則徐爲兩廣總督裕謙爲江蘇巡撫癸酉哲布尊丹巴呼圖克圖等覲見調伊里布爲兩江總督鄧廷楨爲雲貴總督癸未命刑部尙書隆文在軍機大臣上行走調鄧廷楨爲閩浙總督桂良爲雲貴總督戊子陳官俊免以廖鴻荃爲工部尙書軍機大臣文慶免是歲朝鮮琉球入貢

二十年春正月壬辰朔加王鼎太子太保戊戌以阿勒精阿爲熱河都統己亥理藩院禁哲布尊丹巴呼圖克圖用旗徽並未奏明奕紀褫御前大臣戶部尙書總管內務府大臣並繁縵免管理藩院賽尙阿降二品頂戴調隆文爲戶部尙書壬寅皇后鈕祜祿氏崩戊申謚大行皇后爲孝全皇后庚戌奕紀逮問庚

申以奕紀收沙布朗魄送銀遣戍黑龍江賽尙阿等均下部嚴議二月癸亥以阿勒精阿爲刑部尙書訥爾經額爲熱河都統哈豐阿爲西甯辦事大臣丁卯戶部尙書何淩漢卒以卓秉恬代之以祁寯藻爲兵部尙書沈岐爲左都御史丁丑河東河道總督栗毓美卒以文沖爲河東河道總督是月給安徽桐城縣貧民口糧貸山西河保等營兵丁穀石三月命何汝霖在軍機大臣上學習行走召奕山來京以布彥泰爲伊犁將軍辛亥以璧昌爲察哈爾都統是月貸山西吉州等九州廳縣倉穀夏四月辛酉朔册設孝全皇后翼日頒詔己巳調經額布爲吉林將軍丙子以祥康爲庫倫辦事大臣戊寅上詣黑龍潭祈雨乙酉賜李承霖等一百八十人進士及第出身有差戊子上詣廣潤祠祈雨是月貸直隸紫金關及所屬浮圖峪等三營弁兵倉穀六月丁卯以色克津阿爲綏遠城將軍丁丑林則徐等奏擊燬載煙洋艇庚辰英船入浙洋圍定海縣城命余步雲會烏爾恭額等援之甲申英人陷定海縣知縣姚懷祥等死之褫烏爾恭額及浙江提督祝廷彪職仍留任調瑚松額爲熱河都統訥爾經額爲陝甘總

督秋七月癸巳英船犯浙江乍浦海口命奇明保率兵禦之英師犯福建廈港砲台參將陳勝元等擊卻之內申禩浙江巡撫烏爾恭額職以劉韻珂代之丁酉命伊里布爲欽差大臣赴浙江勦辦以裕謙兼署兩江總督以湍多布爲伊犁參贊大臣花山太爲塔爾巴哈台參贊大臣甲辰英船泊天津口外遞信與琦善訴屈命琦善接收仍飭勿進口丙午花山太邊喀什噶爾辦事領隊大臣調湍多布爲塔爾巴哈台參贊大臣以福興阿爲伊犁參贊大臣庚戌林則徐等奏續獲販煙人犯諭以空言搪塞切責之乙卯英船至山海關等處丙辰命伊里布等英人如有投遞書信卽接受馳奏是月賑湖北沔陽等三州縣水災八月甲子以邵甲名著浙江巡撫丙子英人復侵福建廈門提督陳階平等擊走之己卯命琦善爲欽差大臣赴廣東查辦並諭伊里布及沿海督撫防守要隘洋船停泊外洋勿問調訥爾經額署直隸總督以瑚松額署陝甘總督庚辰廉敬遷成都將軍以德楞額爲烏里雅蘇台將軍辛巳裕謙奏英人呈遞原書不敢上聞諭切責之是月給江蘇上元等十四縣水災口糧並修屋費九月庚

寅林則徐鄧廷楨命交部嚴加議處以琦善署兩廣總督辛卯以托渾布奏英船南去命耆英托渾布酌撤防兵召鄧廷楨來京以顏伯燾爲閩浙總督張澧中爲雲南巡撫甲午諭周天爵等卹湖北各州縣水災乙未禡林則徐鄧廷楨職命赴廣東候查問己亥英船入浙江慈谿餘姚二縣內洋伊里布等擊走之以烏爾恭額不代奏英人書信逮問是月給江蘇泰興縣水災口糧十月壬申以謁陵命莊王等留京辦事壬午以孝全皇后梓宮奉安龍泉峪上詣觀德殿行祖奠禮乙酉調祿普爲烏里雅蘇台將軍是月賑直隸滄州等三州縣災民給安徽東流含山二縣軍民口糧貸奉天白旗堡小黑山水災口糧蠲緩直隸滄州等二十三州縣湖北沔陽等八州縣衛水災新舊正雜額賦十一月庚寅上謁西陵免經過地方額賦十分之五甲午上謁泰陵泰東陵昌陵並詣孝穆皇后孝慎皇后陵寢奠酒孝全皇后梓宮前行遷奠禮乙未孝全皇后梓宮奉安地宮上臨視命皇子行禮己亥上還京師癸卯祿普改荊州將軍調奕湘爲烏里雅蘇台將軍英人陷定海戊申烏爾恭額論紋壬子伊里布奏英人要求

澳門定海貿易諭琦善令英人退還定海癸丑以周天爵擅用非刑褫職遣戍伊犁以裕泰爲湖廣總督以吳其濬爲湖南巡撫是月賑江蘇上元等十六縣直隸天津縣水旱災貸江蘇江甯駐防及督飭各營駐紮災區兵餉黑龍江墨爾根城水災屯丁口糧屋費蠲緩江蘇泰州等七十二州縣衛直隸天津縣山西河曲縣新舊額賦十二月以孝全皇后升祔奉先殿上親詣告祭翼日命皇四子行禮戊辰調余步雲爲浙江提督以鐵麟爲察哈爾都統恩桂爲左都御史以璧昌爲伊犁參贊大臣己卯調吳文鎔爲湖北巡撫以劉鴻翔爲福建巡撫癸未召瑚松額來京以恩特亨額署陝甘總督是月給福建龍谿南靖二縣水災口糧屋費貸江蘇江陰等三營兵餉蠲緩浙江長興等四縣水旱災新舊正雜額賦是歲朝鮮入貢

清史稿

本紀十九

宣宗本紀三

二十一年春正月己丑英人寇廣東虎門副將陳連陞及其子舉鵬死之庚寅以奕山爲御前大臣辛卯琦善以虎門陷下部嚴議褫提督關天培頂戴命奕山爲靖逆將軍隆文楊芳爲參贊大臣督辦廣東海防命賽尙阿在軍機大臣上行走庚子命訥爾經額駐天津督辦海防命哈喀阿赴山海關督辦海防命耆英等勦哨探己巳命伊里布回兩江總督任以裕謙爲欽差大臣辦浙江軍務辛亥琦善褫大學士仍下部嚴議是月賑奉天白旗堡水災旗戶給江蘇江都丹徒二縣水災倉穀奉天小黑山站丁江蘇廟灣場臨丁安徽東流繁昌二縣水旱災口糧貸湖北沔陽等八州縣衛湖南武陵縣甘肅金州等五州廳縣水災籽種江蘇上元等十一縣甘肅皋蘭縣水災口糧山西河曲縣雹災倉穀庚申以伊里布遷延不進下部嚴議辛酉琦善逮問仍籍其家以祁埏爲兩廣總督怡良兼署李振祐署刑部尙書授訥爾經額直隸總督恩特亨額陝甘總

督丙寅越南國王阮福皎卒詔停貢方物戊辰英人去定海以伊里布庸懦礙協辦大學士留兩江總督任命寶興爲大學士仍留四川總督以奕經協辦大學士戊寅命齊慎爲參贊大臣赴廣東會勦壬午英人陷廣東虎門砲台及烏涌卡邊廣東水師提督關天培署湖南提督祥福等死之是月展賑江蘇江甯通州二府州災民三月丙戌朔釋周天爵赴廣東軍營甲午上謁西陵免經過地方額賦十分之三乙未致仕大學士文孚卒丙申英人兵船入廣東內港楊芳等擊走之戊戌上謁泰陵泰東陵昌陵至龍泉峪孝穆皇后孝慎皇后孝全皇后陵寢奠酒己亥上再謁昌陵行數土禮詣隆恩殿行大饗禮壬寅上還京師丙午上臨故大學士文孚第賜奠戊申准米里堅等國通商庚戌以裕謙奏命沿海通商口岸照舊准商民貿易壬子楊芳等請仍准英國商船在廣東貿易不許命將楊芳怡良嚴議閏三月乙卯朔褫楊芳怡良職仍留任丙寅湯金釗降調調卓秉恬爲吏部尙書協辦大學士祁雋藻爲戶部尙書以許乃普爲兵部尙書丁卯召伊里布來京以裕謙爲兩江總督命定海防務交劉韻珂辦

理調梁章鉅爲江蘇巡撫以周之琦爲廣西巡撫乙亥諭奕山等撫恤各國洋商是月貸山西吉州等十州縣暨和林格爾廳上年歉收倉穀蠲緩江蘇宿遷縣被水灘租夏四月己丑命裕謙仍爲欽差大臣督辦浙江海防英人陷廣東城外砲台甲辰禮部尙書奎照病免以色克精額爲禮部尙書賜龍啟瑞等二百二人進士及第出身有差辛亥命睿親王等大學士軍機大臣各部尙書會同刑部訊伊里布癸丑以廣東省城圍急准奕山等奏令英人通商是月綏徵山西朔州等六州廳縣逋賦五月丙辰英船入浙洋命裕謙申嚴各海口兵備癸亥鄧廷楨林則徐遣戍伊犁癸酉英船去廣東虎門穆彰阿免管理藩院命賽尙阿代之參贊大臣戶部尙書隆文卒于軍庚辰調敬徵爲戶部尙書賽尙阿爲工部尙書恩桂爲理藩院尙書壬午調吳文鎔爲江西巡撫錢寶琛爲湖南巡撫以奕興爲綏遠城將軍六月准祁墳等奏定商船赴天津等處章程庚寅褫伊里布職發軍台效力贖罪准奕山等奏分期撤兵戊戌琦善論斬癸卯河南下南廳河決辛卯褫文冲職仍留河東河道總督任牛鑑下部嚴議七月

丙辰命王鼎等赴東河督工壬戌以李振祐爲刑部尙書丁卯以達賴喇嘛于四月坐床頒敕書戊辰命前寧夏將軍特順保爲參贊大臣赴廣東辛未以河水汎濫命牛鑑移民賑恤己卯南掌入貢庚辰英人陷福建廈門總兵江繼芸等死之以故越南國王阮福暉子阮福曦爲越南國王命廣西按察使寶清往册封八月癸未以桂輪爲熱河都統丁亥英人寇浙江庚寅以朱襲爲河東河道總督辛卯萬壽節上詣皇太后宮行禮御正大光明殿皇子及王以下文武大臣蒙古使臣外藩王公行慶賀禮視文冲職枷號河干以王鼎署河東河道總督英人去廈門丁酉英人寇浙江雙澳石浦等處裕謙督兵擊走之命怡良赴福建查辦軍務以梁寶常署廣東巡撫庚子以趙炳言爲湖北巡撫辛丑英人復大舉寇浙江戊申英人再陷定海總兵王錫朋鄭國鴻葛雲飛等死之裕謙余步雲下部嚴議是月免陝西華州大荔二州縣河南睢州等八州廳縣水災額賦九月乙卯英人陷鎮海欽差大臣裕謙死之提督余步雲遁命奕經爲揚威將軍哈喇阿胡超爲參贊大臣督辦浙江海防命怡良爲欽差大臣會同

顏伯燾劉鴻翱督辦浙江海防以牛鑑署兩江總督鄂順安署河南巡撫丁巳命文蔚爲參贊大臣赴浙江胡超仍駐天津命特依順爲參贊大臣赴浙江哈頓阿仍駐山海關命祁寯藻在軍機大臣上行走授牛鑑兩江總督辛酉英人陷浙江寧波府己巳上閱火器營兵是月賑奉天遼陽等六州縣水災冬十月戊子命僧格林沁等巡視天津海口辛卯英船入台灣海口達洪阿等擊退之命王得祿赴台灣協勦是月賑湖南華容縣岳州衛江西德化等十縣水災加賑湖北沔陽等九州縣山西薩拉齊廳災民江蘇上元等十五縣衛災民並免額賦給安徽無爲等十二州縣水災口糧屋費并免額賦十一月庚午以程希采署江蘇巡撫以青海玉樹番族雪災免徵銀二年戊寅英人陷浙江餘姚縣復入慈谿是月賑江蘇上元江甯二縣災民十二月戊子視顏伯燾職以楊國植爲閩浙總督己丑以梁萼涵爲山西巡撫癸巳英人陷浙江奉化縣壬寅湖北崇陽縣匪鍾人杰作亂攻陷縣城命裕泰等督兵討之以程希采爲江蘇巡撫丙午英船寇浙江乍浦戊申英船寇台灣淡水雞籠達洪阿等擊退之是

月賑江蘇新陽縣災民展賑河南祥符等六縣江蘇上元等十縣災民貸河南睢州柘城縣貧民籽種口糧並平糶淮甯縣倉穀緩徵江西南昌等二十二縣通賦浙江橫浦浦東二場竈課是歲朝鮮琉球南掌入貢

二十二年春正月丙辰楊國植病免以怡良爲閩浙總督梁寶常爲廣東巡撫甲子盛京將軍耆英改廣州將軍以禧恩署之己巳湖北崇陽賊匪陷通山裕泰遣兵擊敗之丁丑克復湖北崇陽縣獲匪首鍾人杰是月賑安徽無爲等十二州縣衛奉天遼陽等六處新民等四廳縣災民給安徽泗州等二十二州縣衛浙江海甯等七州縣水災口糧貸江西德化等七縣湖南武陵縣湖北嘉魚等九縣衛陝西葭州等五州縣水災籽種口糧山西薩拉齊廳歉收倉穀江蘇災區京右等營兵餉蠲緩浙江海甯等九州縣衛水災新舊額賦二月丙戌命林則徐仍戍伊犁丙申奕經等進攻寧波失利釋伊里布赴浙江軍營命耆英爲署杭州將軍王鼎乞假命齊慎仍爲參贊大臣辦理浙江軍務丙午命耆英爲欽差大臣會同特依順守浙江省城并命劉韻珂會辦防務責成奕經等守沿

海各口岸是月賑盛京遼陽等處江蘇上元等八縣災民三月壬子上幸南苑
癸丑上行圍翼日如之丁巳上還圓明園恩特亨額卒以富呢揚阿爲陝甘總
督璧昌爲陝西巡撫以慶昌爲伊犁參贊大臣是月獨綏河南鄭州積澇地畝
逋賦夏四月癸未英人復寇台灣達洪阿等擊走之加達洪阿太子太保己丑
英人去甯波府甲午上詣黑龍潭神祠祈雨乙未英人陷浙江乍浦同知韋逢
甲死之庚子褫余步雲職逮問丙午鍾人杰伏誅是月貸湖南鳳凰等五廳縣
屯丁苗佃籽種口糧山西吉州等十四州縣倉穀緩徵山西陽曲縣薩拉齊廳
通穀五月己酉大學士王鼎暴卒丙辰降湯金釗爲光祿寺卿丁巳湯金釗乞
休允之戊午奕山以查奏不實褫左都御史並祁墳梁寶常褫職留任己未禮
部尙書色克精額卒以恩桂代之以吉倫泰爲理藩院尙書以奎照爲左都御
史壬戌英人陷江蘇寶山縣提督陳化成死之命耆英伊里布赴江蘇會同牛
鑑防勦丁卯英人陷上海縣典史楊慶恩死之命賽尙阿爲欽差大臣會同訥
爾經額防勦是月貸江蘇山陽縣及淮安等二縣衛歉收籽種六月戊寅朔日

食獨緩湖北被匪滋擾之崇陽等五縣衛新舊額賦己丑辛卯以文慶爲庫倫辦事大臣壬辰獨緩浙江被擾之定海等十二縣新舊額賦癸巳英船寇京口丙申英船寇鎮江齊慎等遁丁酉英人陷鎮江副都統海齡死之秋七月甲寅英船寇江甯省城命伊里布等議款命奕經進駐常州己未耆英奏與英兵官瑪禮遜等議罷兵諭朕以民命爲重令安行定議癸亥耆英等請與英兵官定約鈐御寶諭朕因億萬生靈所繫允所請庚午江南桃北廳河決是月賑巴里坤地震災八月戊寅耆英奏廣州福州廈門甯波上海各海口與英國定議通商戊子麟慶以貽誤河防褫職留任命敬徵廖鴻荃赴江南查勘河工是月貸巴里坤地震災修屋費九月丁未沈岐乞終養允之以李宗昉爲左都御史己酉授禧恩盛京將軍戊午朱樹乞終養允之命周天爵以二品頂戴署漕運總督己未兩江總督牛鑑視職速問命耆英代之召奕山來京以伊里布爲欽差大臣廣州將軍辦理善後事宜辛酉河東河道總督朱襄卒以慧成署之癸亥召奕經文蔚來京命齊慎回四川提督甲戌命伊里布議通商稅課事宜乙亥

壁昌遷福州將軍以李星沅爲陝西巡撫冬十月庚辰上閱圓明園八旗槍兵丙戌奕山奕經文蔚交刑部治罪特依順齊慎下部嚴議庚寅減免江蘇濱海被兵太倉等四十廳州縣衛新舊額賦有差甲午奕山奕經文蔚均奪職論斬特依順齊慎褫職留任乙未命戶部尚書敬徵協辦大學士調恩桂爲吏部尚書以麟魁署禮部尚書戊戌慶郡王奕綵緣事奪爵不入八分輔國公絳性奪爵發盛京是月賑江蘇桃源沐陽二縣水災給湖北江陵等四縣山西保德等三州廳縣災民口糧貸奉天牛莊等處災民口糧蠲緩江蘇海州等五州縣湖南澧州等八州縣衛新舊額賦十一月丁未召科布多參贊大臣固慶來京以果勒明阿代之召烏里雅蘇台參贊大臣盛貴來京以樂斌代之召駐藏大臣孟保來京以海模代之以潘錫恩爲江南河道總督授慧成河東河道總督丙辰允周天爵回籍守制以廖鴻荃署漕運總督甲子命怡良查辦達洪阿等妄殺被難洋人丁卯牛鑑論斬甲戌給江蘇濱江被兵等丹徒六縣貧民口糧屋費並免通州等十三州縣廳額賦有差是月給江蘇蕭縣徐州衡水災口糧蠲

綏浙江淳安等三縣新舊額賦十二月辛巳召廖鴻荃來京以李湘葵署漕運總督已丑設通永鎮總兵駐蘆台以向榮爲通永鎮總兵庚寅召程喬采來京以孫善寶爲江蘇巡撫乙未托渾布病免以程喬采爲山東巡撫戊申命大學士九卿科道議余步雲罪處斬己亥調梁寶常爲山東巡撫程喬采爲廣東巡撫是月給福建峯市等三縣廳水災口糧屋費是歲廓爾喀朝鮮琉球來貢二十三年春正月辛亥命李德成剛赴南河會同潘錫恩督工壬子英兵官僕鼎查回香港留馬禮遜等候議約命伊里布等籌辦通商事宜命李湘葵會同耆英籌辦江北善後事宜是月賑江蘇蕭縣桃源縣災並給沭陽等六縣衛口糧貸湖北江陵等三縣衛湖南澧州洞庭二營水災子種口糧二月乙未欽差大臣廣州將軍伊里布卒命祁墳接辦通商稅則丁酉烏里雅蘇台將軍奕湘改廣州將軍以祿普代之辛丑調奕興爲烏里雅蘇台將軍祿普爲綏遠城將軍是月貸湖北荊州被水駐防倉穀三月庚戌命耆英爲欽差大臣辦理江浙通商事宜璧昌署兩江總督丁巳御試翰林詹事等官擢萬青藜五員爲一等

餘升黜有差乙丑祿普邊鎮紅旗蒙古都統調奕興爲綏遠城將軍以桂輪爲烏里雅蘇台將軍起琦善爲熱河都統丙寅起文蔚爲古城領隊大臣起奕經爲葉爾羌幫辦大臣丁卯怡良奏達洪阿姚瑩並無戰功命褫職逮問尋免達洪阿姚瑩治罪是月貸山西絳州等六州縣湖北荊州駐防被災倉穀江甯駐防暨督協各營災歉兵丁銀湖南鳳凰等五廳縣苗佃屯丁子種口糧夏四月甲戌朔以維勤爲烏魯木齊都統丙子授麟魁禮部尙書丁丑以御史陳慶鏞勦仍奪琦善文蔚奕經職奎照病免以特登額爲左都御史薩迎阿爲熱河都統庚子命耆英與英人會議通商戊辰怡良病免以劉韻珂爲閩浙總督調吳其濬爲浙江巡撫以陸費瑒爲湖南巡撫六月乙亥湖南武岡州賊匪曾如炷作亂戕知州徐光弼命吳其濬討捕之甲午曾如炷伏誅秋七月乙巳河決東河中牟九堡慧成下部嚴議尤耆英奏定通商稅則先在廣州市易改命敬徵何汝霖赴東河查勘丙午命鄂順安振沿河被水災民閏七月戊寅直隸永定河決乙酉中牟決口未塞命枷慧成河干以鍾祥爲河東河道總督丙戌召法

豐阿來京以德興爲西甯辦事大臣丁亥命廖鴻荃往河南會同督辦河工己丑起麟慶赴東河辦工庚寅命敬徵等議製紙鈔甲午調吳其溶爲雲南巡撫以管番羣爲浙江巡撫八月癸卯乙巳申諭程懋采撫卹安徽被水各州縣災民是月賑陝西沔縣等三縣水災雹災九月甲午命李湘棻以三品頂戴署漕運總督是月賑山東福山縣水災蠲緩直隸景州等二十七州縣山東福山縣水災雹災正雜額賦冬十月己酉著英奏通商事竣命回兩江總督任辦善後及上海通商事宜祁垵等辦粵省未盡事宜庚戌起琦善爲駐藏辦事大臣甲子起達洪阿爲哈密辦事大臣是月賑安徽太和等三縣山西岢嵐州水災雹災貸安徽太和等四縣齊齊哈爾等四處歉收口糧蠲緩奉天遼陽等六州廳縣濟陽等三處齊齊哈爾等四處山東臨清等二十七州縣衛安徽泗州等三十七州縣衛山西岢嵐等七州縣湖南澧州等六州縣衛被災新舊正雜額賦十一月己巳朔日食己卯以王植爲浙江巡撫壬午調程懋采爲浙江巡撫以王植爲安徽巡撫丁酉上詣大高殿祈雪是月賑江蘇沐陽縣大河衛災民貸

江西南昌等十五縣陝西綏德等九州縣子種口糧倉穀蠲緩直隸新河等四縣江蘇高郵等六十八州廳縣衡水旱災新舊額賦十二月辛丑議定意大利亞國通商章程甲辰調梁寶常爲浙江巡撫以崇恩爲山東巡撫丙午雪丁巳命劉韻珂辦甯波通商事宜禮部尙書巽守正病免以陳官俊代之是月蠲緩河南睢州等十六州縣被水新舊正雜額賦是歲朝鮮緬甸暹羅入貢

二十四年春正月辛卯貸陝西葭州等四州縣山西大同等三縣水災雹災子種二月戊戌朔祁墳病免調耆英爲兩廣總督以璧昌署兩江總督庚子以謁東陵命肅親王敬敏等留京辦事庚戌以中牟墾工復蠲賑魁廖鴻荃職給七品頂戴仍留河工鍾祥褫職留東河總督任鄂順安降三品頂戴以特登額爲禮部尙書文慶爲左都御史調陳官俊爲工部尙書以李宗昉爲禮部尙書杜受田爲左都御史癸丑甲寅命穆彰阿留京辦事以程喬采奏米利堅使欲來天津朝覲並議通商章程命耆英赴廣東會同程喬采妥辦米利堅等國通商事宜丁卯免經過地方田賦十分之三是月給江蘇海州等三州縣衛民屯

口糧三月壬申命耆英爲欽差大臣辦理通商善後事宜仍令程喬采諭止米里堅來京內戊鍾祥等奏河工善後事宜諭一夫失所辜在朕躬卿等善爲之是月貸山西平定等十一州廳縣歉收倉穀夏四月己酉修廣東虎門各內洋砲台壬子臺灣匪平辛酉賜孫毓淮等二百有九人進士及第出身有差是月加給河南睢州等十五州縣水災三月口糧六月丁酉直隸永定河決壬寅湖南耒陽縣匪楊大鵬等作亂命陸費瑤等討捕之己酉定米利堅通商條約是月緩徵山東臨清等二十二州縣並德州東昌二衛被災新舊額賦有差秋七月辛巳富呢揚阿及提督周悅勝下部嚴議甲申湖南耒陽縣匪平匪首楊大鵬伏誅戊子湖北荊州萬成隄決庚寅辛卯召奕興來京以鐵麟署綏遠城將軍阿彥泰署察哈爾都統是月加給河南中牟等九縣水災三月口糧陝西葭州雹災子種八月賑山西汾陽縣水災雹災並獨緩汾陽等三縣額賦九月給河南淮寧等三縣水災口糧冬十月甲午朔准布魯特阿希木襲四品銜頂己酉葉爾羌參贊大臣奕經改伊犁領隊大臣以麟魁代之壬戌伊犁參贊大

臣達洪阿病免命林則徐赴阿克蘇烏什庫車和闐等處勘議開墾事宜癸亥以舒輿阿爲伊犁參贊大臣是月賑直隸霸州汝清二州縣旗民給奉天錦州等八州廳縣水災口糧蠲緩直隸霸州等二十七州縣奉天金州等八州縣廳湖北沔陽等二十九州縣衡水旱災雹災新舊額賦十一月乙丑允桂良來覲以吳其濬兼署雲貴總督前刑部侍郎黃爵滋以員外郎等官用甲申上詣大高殿祈雪是月貸盛京金州水師營款收口糧十二月癸巳朔上再詣大高殿祈雪庚子申命林則徐赴喀什噶爾查勘開荒辛丑上詣大高殿祈雪命卓秉恬爲大學士以陳官俊爲禮部尙書協辦大學士杜受田爲工部尙書祝慶蕃爲左都御史是月加給河南睢州等十五州縣被災口糧並貸籽種倉穀貸江甯駐防兵丁江蘇各營兵匠銀米是歲朝鮮遞羅入貢

二十五年春正月乙丑河南中牟河工合龍庚午調李星沅爲江蘇巡撫惠吉爲陝西巡撫以程希采爲漕運總督黃恩彤爲廣東巡撫戊子召容照來京以麟慶爲庫倫辦事大臣是月給直隸霸州永清二州縣災民口糧貸江西德化

等五縣湖北江陵等六縣衛湖南沅江安鄉二縣軍民籽種庚戌以福濟爲總管內務府大臣癸丑睿親王仁壽坐濫保海模禩宗人府左宗正領侍衛內大臣內廷行走敬徵坐濫保孟保禩協辦大學士戶部尙書命兩廣總督耆英協辦大學士調賽尙阿爲戶部尙書裕誠爲工部尙書以文慶爲兵部尙書成剛爲左都御史調僧格林沁爲廂黃旗領侍衛內大臣以車登巴咱爾爲正黃旗領侍衛內大臣甲寅調惠吉爲福建巡撫以鄧廷楨爲陝西巡撫乙丑頒發五口通商章程己巳上閱圓明園八旗槍兵癸未麟慶病免以成凱爲庫倫辦事大臣是月貸山西忻州等十七州縣廳款收倉穀夏四月癸卯桂良留京以賀長齡爲雲貴總督甲辰調吳其濬爲福建巡撫惠吉爲雲南巡撫以喬用遷爲貴州巡撫丙午上詣黑龍潭祈雨壬子富呢揚阿卒以惠吉爲陝西巡撫鄧廷楨署之以鄭祖琛爲雲南巡撫乙卯賜蕭錦忠等二百七十七人進士及第出身有差丙辰裕誠許乃普降調以敬徵爲工部尙書何汝霖爲兵部尙書五月丙戌兩丁亥上再詣黑龍潭祈雨是月給山東樂安等六縣水災口糧六月甲午

允比利時國通商詔停本年秋決丙申命崇恩勦捕濮州鄆城等處捻匪辛丑賑台灣彰化縣地震災民癸丑阿克蘇辦事大臣輯瑞以墾荒未奏率即興工褫職己未江蘇中河廳桃源汛河決甘肅西寧鎮總兵慶和遇番賊於金羊嶺死之命惠吉勦捕番賊是月綏徵山東濱州等四十二州縣衛被災通賦秋七月辛未允丹麻爾國通商命大學士卓秉恬管兵部丙戌命達洪阿赴甘肅查辦番賊八月壬辰詔皇太后七旬萬壽免道光二十年以前實欠正雜田賦辛丑調鄭祖琛爲福建巡撫梁萼涵爲雲南巡撫吳其濬爲山西巡撫敬徵病免調特登額爲工部尙書以保昌爲禮部尙書丙戌召林則徐回京以四五品京堂候補禮恩病免調奕湘爲盛京將軍己丑冬十月甲午加上皇太后徽號曰恭慈康裕安成莊惠壽禧崇祺皇太后上進冊寶率皇子王公大臣行慶賀禮戊戌皇太后七旬聖壽上率皇子王公大臣行慶賀禮辛丑李宗昉病免以祝慶蕃爲禮部尙書魏元烜爲左都御史癸卯以上皇太后徽號禮成頒詔覃恩有差丙午免直隸道光二十年以前民欠各項旗租是月賑直隸寶坻等四縣

災民十一月辛酉陝甘總督惠吉卒以布彥泰爲陝甘總督林則徐署之薩迎阿爲伊犁將軍桂良爲熱河都統癸亥御史陳慶鏞降調是月貸熱河圍場歉收兵丁銀十二月辛卯上詣大高殿祈雪戊戌免台灣道光二十年以前民欠租穀糧米癸卯上再詣大高殿祈雪癸丑上復詣大高殿祈雪是歲朝鮮越南入貢

二十六年春正月庚辰命賽尙阿周祖培查勘江防辛巳弛天主教禁以陸建瀛爲雲南巡撫是月給奉天鳳凰城岫巖廳旗民直隸寶坻等四縣口糧貸甘肅靜寧等十三縣災民籽種二月己丑雲南永昌回匪作亂命提督張必祿勦之乙卯以謁陵命定郡王載銓等留京辦事三月癸亥上謁西陵免經過地方額賦十分之三丁卯上謁泰陵泰東陵昌陵至孝穆皇后孝慎皇后孝全皇后陵奠酒庚午上幸南苑行圍辛未上行圍翌日如之乙亥上還京師興平倉火乙酉上詣黑龍潭祈雨以林則徐爲陝西巡撫是月貸山西平定等九州縣歉收倉穀夏四月辛丑以雲南永昌回民藉端尋衅命賀長齡查辦丙午上詣黑

龍潭祈雨庚戌以端充爲科布多參贊大臣五月壬戌上詣黑龍潭祈雨乙丑張必祿收回匪於永昌以上年殺永昌內應回民過多賀長齡下部議處丁卯上復詣黑龍潭祈雨英人退出舟山閏五月乙酉朔青海黑錯四溝番作亂命布彥泰剿之癸巳永昌回匪遁入猛庭賀長齡督兵剿之戊申以麟魁爲烏里雅蘇台參贊大臣六月戊午命祁寯藻文慶查辦天津鹽務壬午以予告大學士阮元重逢鄉舉晉太傅食全俸癸未達洪阿勦竄匪果岔番賊敗之秋七月辛卯禧恩以失察奸民褫公爵降鎮國將軍壬寅上閱吉林黑龍江官兵馬步射癸卯以雲南漢回積嫌未釋命賀長齡持平辦理勿分畛域辛亥申嚴門禁是月賑三姓及寧古塔等處水災八月壬申命盛京直隸江南浙江福建山東廣東七省將軍督撫籌辦練兵儲餉癸酉上閱火器營兵乙亥賀長齡以防勦無功降河南布政使命李星沅爲雲貴總督調陸建瀛爲江蘇巡撫以張日昫爲雲南巡撫丙子布魯特匪入喀什噶爾卡倫命賽什雅勒泰勦之九月己亥湖南新田縣匪王棕獻等作亂捕誅之戊申以楊殿邦署漕運總督辛亥江蘇

昭文縣匪金得順等作亂捕誅之是月賑山東東平萊蕪二州縣災民賑三姓
彈春水災旗民給山東汶上等四縣災民口糧蠲緩奉天遼陽等十三州廳縣
直隸霸州等三十五州縣山東東平等四州縣災歉新舊額賦十月丁巳免黑
錯四清番民額賦丙寅以徐繼畬爲廣西巡撫是月給河南汲縣等八縣陝西
府谷神木二縣災民口糧蠲緩湖南澧州等五州縣暨岳州衛被災額賦十一
月乙酉桂輪改荊州將軍以特依順爲烏里雅蘇台將軍乙未上詣大高殿祈
雪丙午命壁昌等籌議江蘇漕糧酌分海運己酉黃恩彤以奏請賜應試年老
武生職銜下部嚴議辛亥命山東嚴緝虜人勒贖匪是月賑山西垣曲縣災民
蠲緩山西保德等六州縣暨歸化城等三處浙江餘杭等四十四縣衛直隸安
州等六州縣被災新舊額賦十二月癸丑黃恩彤褫職調徐廣縉爲廣東巡撫
以程裔采爲雲南巡撫楊殿邦爲漕運總督癸亥雲南猛統回匪竄入緬甸命
陸建瀛查辦甲子西甯辦事大臣達洪阿病免以哈勒吉那代之戊辰以王兆
琛爲山西巡撫庚午命清釐刑部及直隸山東山西河南陝西甘肅各省庶獄

命寶興留京管刑部貢琦善二品頂戴爲四川總督丙子調鄭祖琛爲廣西巡撫徐繼畲爲福建巡撫是月給浙江縉雲宣平二縣水災口糧是歲朝鮮琉球入貢

二十七年春正月癸未調成凱爲塔爾巴哈台參贊大臣乙酉鐵麟遷荊州將軍以裕誠爲察哈爾都統是月給浙江富陽等六縣衛安徽五河等三縣江蘇桃源等五縣衛上年災歉口糧河南河內等十三縣水旱災口糧籽種並貸輝縣等八縣倉穀貸陝西葭州等三州縣直隸蔚州等三十九州縣災歉籽種口糧倉穀二月己未雲南雲州回匪作亂命李星沅剿之癸亥以謁陵命載銓等留京辦事丙子以福建海盜劫殺洋商命劉韻珂等搜捕戊寅上謁東陵免經過地方額賦十分之三三月給河南汲縣等五縣被災口糧乙未壁昌遼內大臣調李星沅爲兩江總督以林則徐爲雲貴總督楊以增爲陝西巡撫戊戌英船退出虎門乙巳以魏元烜爲禮部尙書賈楨爲左都御史夏四月戊午布魯特匪復攻色埒庫勒伯克巴什等擊走之賽什雅勒泰等奏英人據音底努普

爾各部咸附之內寅免熱河豐寧縣通賦及旗租銀癸酉賜張之萬等二百三十一人進士及第出身有差是月貸江西上新昌二縣湖南鳳凰等五廳縣屯丁苗佃籽種口糧五月丙戌御試翰林詹事等官擢王慶雲四員爲一等餘升黜有差何汝霖憂免調魏元煩爲兵部尙書以賈植爲禮部尙書孫瑞珍爲左都御史丁亥命文慶陳孚恩在軍機大臣上行走辛卯以廣東民情與洋人易啟衅端命擇紳士襄辦交涉事宜丁未擢曾國藩爲內閣學士六月理藩院奏俄羅斯達喇嘛請在塔爾巴哈台伊犁喀什噶爾通商不許秋七月己卯命林則徐讞雲南回民控訴香匪殺無辜一萬餘人之獄乙未命林則徐讞雲南回民杜汝秀控訴被誣從逆之獄癸卯以河南旱災發庫銀十萬兩並撥鄰省銀二十萬兩賑之八月己酉安集延匪犯喀什噶爾吉明等擊走之賽什勒雅泰自殺調奕山爲葉爾羌參贊大臣癸亥以布彥泰赴肅州調度命楊以增署陝甘總督恒春署陝西巡撫甲子以喀什噶爾卡外布魯特安集延匪作亂命布彥泰爲定西將軍奕山爲參贊大臣討之以善慶爲烏里雅蘇台參贊大臣

以吉明署葉爾羌參贊大臣戊辰奕湘改杭州將軍調奕興爲盛京將軍以英隆爲綏遠城將軍以河南災廣再撥內帑銀三十萬兩並命戶部撥銀三十萬兩賑之內子安集延匪圍英吉沙爾城命布彥泰駐肅州遣兵討之是月賑甘肅西甯縣水災綏徵山東樂安等六縣被水額賦並水利等四場竈課九月丁丑朔日食戊寅命文慶張澧中赴河南查賑辛巳吉明等遣兵援喀什噶爾擊安集延匪大敗之乙巳以法蘭西兵船入朝鮮命耆英言於法使令其退兵是月給河南禹州等四十一州縣旱災口糧蠲緩直隸安州等三十六州縣水旱災迨災新舊額賦冬十月辛酉湖南新甯縣瑤人雷再浩等作亂陸費瓌等捕討之乙丑上閱健銳營兵戊辰奕山等勦安集延匪于葉爾羌之科熱依瓦特大敗之庚午又敗之於英吉沙爾壬申安集延匪遁走喀什噶爾辦事領隊大臣開明阿等褫職逮問是月蠲緩安徽泗州等三十九州縣水旱災新舊額賦十一月甲申調英隆爲黑龍江將軍成玉爲綏遠城將軍壬辰以張澧中爲山東巡撫乙未湖南新甯賊平庚子湖南道州匪竄廣西灌陽縣命鄭祖琛勦捕

之是月給山西絳州等十一州廳縣口糧蠲緩直隸安州等三州縣山西絳州等十一州廳縣河南禹州等六十四州縣被災新舊正雜額賦十二月戊午湖南乾州廳苗匪作亂命裕泰等勦捕之甲戌召耆英還以徐廣緒署兩廣總督及欽差大臣辦理通商是月給河南祥符等十七縣水災口糧並貸鄭州等倉穀是歲朝鮮琉球來貢

二十八年春正月丁丑加潘世恩太傅寶興太保保昌阿勒精阿李振祜成剛太子太保甲申湖南乾州廳苗匪降命裕泰分別懲辦仍搜餘匪辛卯命廓爾喀使附朝鮮遞羅使筵宴戊戌越南國王阮福暉卒停本年例貢免喀什噶爾民回各戶正雜通賦是月展賑直隸鹽山等五縣災民給安徽鳳陽等三縣水旱災口糧貸湖南安鄉縣山西寧遠等四廳縣甘肅皋蘭等七縣災民口糧種二月壬子吏部尙書恩桂卒文慶罷軍機大臣調爲吏部尙書以麟魁爲禮部尙書桂良改正白旗漢軍都統以惠豐代爲熱河都統以保昌爲兵部尙書壬戌江西長甯崇義兩縣匪作亂命吳文鎔勦捕之甲子以謁陵命睿親王仁

壽等留京辦事三月戊寅雲南趙州匪作亂命林則徐勦捕之以奕山爲伊犁參贊大臣吉明爲葉爾羌參贊大臣壬午上謁西陵免經過地方額賦十分之三丙戌上謁泰陵泰東陵昌陵詣孝穆皇后孝慎皇后孝全皇后陵寢奠酒庚寅上還京師癸卯裕誠遷荊州將軍以雙德爲察哈爾都統是月貸山西吉州等七州縣歉收倉穀夏四月戊辰雲南保山匪平辛未廣西灌陽平樂朔縣等縣匪平六月癸卯朔以徐澤醇爲山東巡撫丙午命耆英留京管禮部授徐廣緒兩廣總督欽差大臣辦理通商以葉名琛爲廣東巡撫癸丑調耆英管兵部甲寅上詣黑龍潭祈雨戊辰以傅繩助爲江西巡撫庚午調吳文鎔爲浙江巡撫秋七月庚寅加林則徐太子太保賞花翎八月丁巳河南巡撫鄂順安褫職以潘鐸代之辛酉俄羅斯商船請在上海貿易却之九月甲戌潘錫恩免以楊以增爲江南河道總督陳士枚爲陝西巡撫召成玉來京以盛城署綏遠城將軍賑江甯等三府水災乙酉賑湖北水災癸巳召喬用遷來京以羅繞典署貴州巡撫是月給湖南武陵等四縣水災口糧屋費冬十月甲寅文華殿大學士

寶興卒丁卯修巴爾楚克城是月賑直隸通州等七州縣安徽無爲等十六州縣水災給安徽和州等十四州縣湖南華容縣岳州衛災民口糧貸湖南安鄉縣澧州災民籽種蠲緩直隸通州等五十二州縣湖北沔陽等三十九州縣衛湖南澧州等九州縣安徽泗州等二十四州縣被災新舊額賦十一月乙亥封故越南國王阮福嘓子福時爲越南國王己卯命耆英爲大學士管兵部以琦善爲協辦大學士仍留四川總督任召瑞元來京以慧成爲科布多參贊大臣御史張鴻升請鑄大錢下部議辛巳命定郡王載銓侍郎季芝昌查辦直隸鹽務大學士耆英侍郎朱鳳標查辦山東鹽務丁亥授耆英文淵閣大學士丁酉以托明阿爲綏遠城將軍是月給江西德化等二十縣水災口糧貸湖南提標及常德等協營災區兵餉蠲緩江蘇泰州等七十七州廳縣衛兩淮呂泗等二十場江西德化等二十二縣直隸安州等六州縣水災新舊額賦十二月丙午上詣大高殿祈雪甲寅上詣大高殿祈雪辛酉上詣天壇祈雪壬戌以侍郎陳孚恩前署山東巡撫不收公費賞一品頂戴並御書扁額乙丑以倭什訥爲吉

林將軍陝西巡撫成剛爲禮部尙書柏倭爲左都御史丙寅以張祥河爲陝西巡撫是月賑直隸通州等十四州縣災民是歲朝鮮琉球暹羅越南入貢

二十九年春正月癸未以奕格爲烏里雅蘇台將軍辛卯命耆英季芝昌查閱浙江營伍及倉庫是月加賑安徽無爲等十四州縣衛水災給湖南澧州等六州縣安徽和州等十三州縣水災口糧貸江西南昌等十二縣湖南澧州等六州縣水災籽種二月庚子朔日食辛丑命劉韻珂撫恤臺灣北路水災震災丙午諭李星沅辦江蘇賑務辛亥穆彰阿潘世恩陳官俊免上書房總師傅命祁寯藻杜受田爲上書房總師傅受田仍授皇四子讀內辰四川中瞻對番工布朗結作亂命琦善勦之以裕誠兼署四川總督是月貸江蘇災區京左等八營一季兵餉三月庚寅徐廣縉等奏兵民互相保衛內河外海現飭嚴防英人進省城一事萬不可行諭嘉納之夏四月壬寅李星沅病免以陸建瀛爲兩江總督調傅繩勛爲江蘇巡撫以費開綬爲江西巡撫丙午陸建瀛等奏南漕毋庸改折從之丁未徐廣縉奏英人罷議進城封徐廣縉子爵葉名琛男爵均一等

世襲諭嘉獎粵人深明大義閏四月辛未以顏以煥署河東河道總督癸酉調趙炳言爲湖南巡撫以羅繞典爲湖北巡撫辛巳琦善勦中瞻對番敗之壬午以德齡爲葉爾羌參贊大臣五月乙巳移廣東澳門稅口於黃埔己酉雲南騰越廳野夷作亂林則徐討平之己未山西巡撫王兆琛以受賂褫職逮問以季芝昌爲山西巡撫是月貸山東滕縣霍災倉穀六月丙子廣東陽山英德等縣匪平己丑禮部尙書成剛卒庚寅調毓書爲烏魯木齊都統以惟勤爲熱河都統秋七月丙申朔福建閩縣匪林仕等作亂捕誅之戊戌協辦大學士吏部尙書陳官俊卒調賈楨爲吏部尙書以孫瑞珍爲禮部尙書王廣蔭爲左都御史以馮集馨爲湖南巡撫己亥命祁禱藻協辦大學士辛亥命湖南布政使萬貢珍賑武陵等縣被水災民丙辰王兆琛遣戍新疆己未林則徐病免以程裔采爲雲貴總督張曰畧爲雲南巡撫降侍郎戴熙三品頂戴休致是月給江西德化等五縣湖南澧州等九州縣衛水災口糧蠲緩江蘇川沙等二十二廳縣新舊額賦八月丁丑陸建瀛奏辦賑及水退情形諭臣民之福卽朕之福丙戌召

季芝昌來京以興裕署山西巡撫是月給奉天錦州旗民江西鄱陽等九縣湖南澧州等十州縣衛水災口糧九月甲辰布彥泰病免以琦善署陝甘總督裕誠署四川總督丙午授顏以煥河東河道總督戊申命署吏部右侍郎季芝昌在軍機大臣行走己酉授琦善陝甘總督以徐澤醇爲四川總督陳慶偕爲山東巡撫癸丑雲南保山界外小字江等處野夷作亂程希采勦平之戊午命服關尚書何汝霖仍在軍機大臣上行走是月給貴州桐梓縣水災口糧並蠲緩額賦冬十月庚午以故朝鮮國王李奂子昇襲爵命瑞常和色本往册封甲申大學士潘世恩請開缺命免軍機大臣庚寅以庶福署熱河都統是月給湖南澧州等七州縣山西徐溝縣被災口糧蠲緩直隸薊州等三十七州縣浙江富陽等二十一縣山西薩拉齊等三廳縣被災新舊額賦十一月甲午朔湖南新寧縣匪李沅發作亂命馮德馨勦之內申太傅子告大學士阮元卒甲辰調興裕爲湖北巡撫以兆那蘇圖爲山西巡撫乙巳阿哥所火庚戌臺灣嘉義縣匪徒吳吮等作亂捕誅之是月賑江西德化等十四縣水災給齊齊哈爾等六城

旗民浙江仁和等八場竈丁口糧蠲緩江蘇泰州等七十三州廳縣衛江西德化等二十一縣被災新舊額賦浙江海沙等十四場竈課十二月庚午湖南道州匪黃三等作亂命裕泰勦之以扎拉芬泰爲塔爾巴哈台參贊大臣辛未皇太后不豫上詣慈寧宮問安自是每日如之甲戌皇太后崩乙亥奉安大行皇太后梓宮於慈寧宮上居倚廬席地寢苦諸王大臣請還宮不允甲申移皇太后梓宮於綺春園迎暉殿自是上居慎德堂苦次乙酉李振祜病免以陳孚恩爲刑部尙書丁亥湖南新寧賊分竄廣西鄭祖琛遣兵防勦是歲朝鮮琉球越南入貢

三十年春正月甲午朔日食丙申以祁禱藥等查覆陝甘總督布彥泰清查關防不密下部嚴議丁酉以王大臣再請停止親送大行皇太后梓宮諭從之戊戌上大行皇太后尊諡曰孝和恭慈康豫安成熙聖睿皇后庚子上詣迎暉殿孝和睿皇后梓宮前行大祭禮甲辰上詣梓宮前行周月祭禮乙巳尊孝和睿皇后陵曰昌西陵丙午上不豫丁未上疾大漸召宗人府宗令載銓御前大臣

載垣端華僧格林沁軍機大臣穆彰阿賽尙阿何汝霖陳孚恩季芝昌總管內
務府大臣文慶公啟鏐匣宣示御書皇四子立爲皇太子是日上崩於圓明園
慎德堂苦次殊諭封皇六子奕訢爲親王四月甲戌上尊諡曰效天符運立中
體正文聖武智勇仁慈儉勤孝敏成皇帝廟號宣宗咸豐二年二月壬子葬慕
陵

論曰宣宗恭儉之德寬仁之量守成之令辟也遠人貿易構釁興戎其視前代
戎狄之患蓋不作矣當事大臣先之以操切繼之以畏葸遂遺宵旰之憂所謂
有君而無臣能將順而不能匡救國步之瀕肇端於此嗚呼悽矣